


土岐文庫  
文庫17  
W82  
12



文章 17  
W 82  
12

宛丘詩鈔

廿四

張耒字文潛號柯山人稱宛丘先生楚州淮陰人少善屬文遊學于蘇轍轍愛之因得從軾遊稱其汪洋冲澹有一唱三歎之聲第進士歷官至直龍圖閣知潤州坐蜀黨徙宣州謫監黃州酒稅徽宗起為太常出知穎汝復坐黨籍落職在穎時聞蘇軾計至為舉哀行服遂貶房州別駕安置于黃後五年得許自便居陳時二蘇及黃晁諸人相繼歿惟耒尚存士人就學者眾分日載酒肴事之其名益甚卒年六十一史稱其詩效白居易樂府效張籍然近體工警不及白而醞藉閒遠別有神韻樂府古詩用意古雅亦長慶為多耳子瞻謂秦得吾工張得吾易謾相壓也要在秦晁以上



昭和六年二月一日  
土岐善唐氏寄贈

010185188383

休日同宋還叔請法雲遇李公擇黃魯直公擇烹賜  
茗出高麗盤龍墨魯直出近作數詩皆奇絕坐中  
懷無咎有作呈魯直還叔

休日不造請出遊賢友同城南上人者宴坐花雨中金猊  
散香霧寶鐸韻天風鳥語演實相飯香悟真空尚書二三  
客淨社繼雷宗黃子發錦囊句有造物功握中一寸煤海  
外千年松誰降午睡應賜茗屠團龍晁子卧城西咫尺不  
可逢豈無坐中客終覺欠此公歸帽見新月撲衫暮塵紅  
困眠有餘想却聽寺樓鐘

掛虎圖于寢壁示結程

畫工出幻事縞素發原藪蕭蕭白茅低凜凜北風走耽然  
老於菟舉步安不驟目光炯雙射怒吻呀欲受彼彪擲其

旁文彩淡初就雖然竊形似已足走百獸煩君衛吾寢振  
此蓬蓽陋坐令盜肉鼠不敢窺白晝

神運殿望香爐天池等峰晚宿官廳明日早發

遠公不出山坐受籠天供地祇敢愛寶木石親輪送巖巖  
千年屋山立屹不動風雲宿脩梁星斗近華棟亭亭碧香  
爐蒼苔時自潤五雲嚴擁衛天樂下鸞鳳神池闕寶像光  
怪發巖洞誰能陟其顛手攬游龍鞵東堂黃金藏龍象儼  
環拱蕭條七國輦拙樸昔誰用掃堂爲一睡清極乃無夢  
思歸戒晨發結束勅僕從鴻鍾振林莽月落朝嵐重再往  
墮渺茫猿鶴應嘲諷

贈張公賁

我昔爲諸生奉書諫議公後來辱稱獎禮數賓客同決科

甫弱冠年少氣如虹歸來陪後乘不責醉後恭孤舟梁宋  
郊旅態萃百窮拜公睢陽府笑語若春風人事不可期俯  
仰異吉凶平生丹竈術馬鬣哭新封十年得吾弟遺舊涕  
沾曾清貧寸家法眉宇肖德容交臂是非外爲寮兄弟中  
東軒語長夏葵竹羅青紅西舍雪夜歡玉顏醉瑤鍾欲飲  
徑相就三更叱閤翁鯨吸絕遺滴山頽信傾峰搜抉盡醬  
茹楂梨倒筐籠通宵兩沉醉午起頭如蓬人生定當爾事  
去挽驚鴻河梁繫君馬一笑喜相逢憐君碧紗幌夜淚哭  
韋叢我方困蘼鹽酸寒官辟靡同尋舊遊地塵壁罨絲蟲  
啼鳥古寺閑夏陰小園空酒市逢好好琵琶失玲瓏歌舞  
一分散賓僚亦西東忘情猶一歎齊物論非通官冷隱朝  
市端能信余慵人生當富貴子盍自磨礪便當引五車一  
一貯心胃功就蠟作垤叢成虵化龍北郊分袂歸作惡驚  
兒童長謠代晤語發子一笑哄

離黃州

扁舟發孤城揮手謝送者山回地勢卷天豁江面瀉中流  
望赤壁石脚挿水下昏昏煙霧嶺歷歷漁樵舍居夷實三  
載鄰里通假借別之豈無情老淚爲一洒篙工起鳴鼓輕  
櫓健於馬聊爲過江宿寂寂樊山夜

宿樊溪

黃州望樊山秀色如可鑿扁舟橫江來山脚繫吾纜大川  
失洶湧淺水澄可攬北風吹踈雨夜枕舟屢撼齊安不可  
望滅沒孤城暗奔流略溪口龍脣屢窺瞰平生千金買戒  
懼敢忘斃茲遊定何名耿耿有餘念

道士磯

匡廬奠九江苗裔遍南服橫江蔽原野內外實一族危磯  
挿江生石色擘青玉蛟龍穴亂石蹂躪在喬木我行季冬  
月江蹟在山腹扁舟如鏡面清淨不可觸躋攀旣不可干  
古長幽獨緬想遂古初巢居戒樵牧

離樊口宿巴河遊馬祈寺

扁舟下樊溪江南正清瀉曉登巴河岸極目望春野步尋  
脩竹寺古木爭偃亞云昔孫仲謀刑牲致師禡雄圖邈已  
矣英槩足悲吒石梯造雲霧丹白開廣廈山僧安寂寞畏  
冷不出舍勞生渴閑境頓使我心寫晚江平若席風勢欲  
相借

龜陵灣阻風三日遙禱孤山而風止

積水多疾風三日阻我舟天寒波濤惡岸窟騰龍虬五更  
船篷鳴冷氣入衾稠平明諸山雪爛熳鋪琳瑯篙工笑相  
顧白我巴船頭永愧小孤神霧鬚橫星眸倉卒禱卽應知  
我厭滯留稍晴景物好柳色含新柔春風我故舊迎我入

東州

自離富池凡三禱順濟龍求便風皆獲應又風日清  
霽舟行安穩委曲如所欲感而成詩

旗尾指船頭篙工告風便張帆施雙櫓去勢如脫箭船傍  
兩高山過目若流電波平舟穩駛客寢兀未變吾聞江西  
龍神力回宇縣往來萬夫禱正直乃獲願嗟余何所恃誠  
俗無所薦神豈哀吾窮有賜不待獻乃知人窮我本不坐  
神譴人間事苦異未易以言辨坐令千里遠近若在几研

慙非謝宣城援筆賦靜練

出山

青山如君子悅我非姿媚相逢一開顏便有論交意今晨  
决然去慘若執我袂謂山無見畱此事寧久置道邊青髮  
翁下有白玉髓斲之龍蛇窟自足飽吾世平生耽幽獨巧  
若安朝市一官等塵垢安得敗成計草堂醉老子虎溪大  
開士寄語二主人爲畱三畝地

離陽翟

驅車發潁川回望矢嵩少霜氛塞層空黯淡寒日曉原田  
際天平百里見飛鳥纍纍道傍丘石獸卧衰草不知誰氏  
碑剝裂偶未倒支離見隸字書帶漢筆妙遺墳不可問文  
彩竟何效永年恃金石此計久可笑昔遊已三歲存沒傷

懷抱飽諳人世憂安得身不老

次潁川

許昌古名都氣象良未替客子遠道來塵埃滿襟袂黃昏  
造孤驛買飯嚙枯藪庭寬蟾蜍高霜氣徹寒被賴馮朱提  
杯可具一飲費無人勸我酌孤燭伴客醉笙簫誰家樓語  
笑月中市何人不行樂而我獨涕淚夜長更漏稀足急敲  
輦駛天明卷席去行止隨所值

同楊二十縑氏寺宿草酌張正民秀才見訪

契闊千里別惻愴難具言殷勤一宵語願子未卽眠空堂  
燈火青旅褐借僧氈勞勞一杯酒不解道路寒經年相從  
樂旣別亦茫然人間事盡爾聚散亦何歎但悲多難身尚  
獲朋友權間關百憂中一笑直萬錢張子年未冠已雄羣

少年嚙蠶坐我側紫眸秀雙頰壯志激衰孺清談破愁煎  
天明即分散奈此情悄悄

初到都下供職寄黃九

千里不相見勞勞復何辭不應一城中耿耿令我思  
儼舍酒家樓榭墟卷其旗鼠壤敗晨炊守翁噪羣兒馬傍挾兩  
羸雙踵待刻移五日長安塵故山夢中歸何以洗我心望  
君青松姿懷情久不吐古屋絃悲詩

晚歸寄無咎

屋東雲移山屋西日半壁餘天一劍青遠雨萬絲白官事  
癡可了未遭官長責惟應晁夫子不可別頃刻

西山寒溪

茲行頗閒暇聊此寄一本云挈家同潘郎游寒溪西山二寺并  
况在山水間况幸有所攜人臭味同

一源山蹊並脩澗嘉木間蒲蓮杉松開鳴一作古刹寺一作始

覺此溪寒孤亭出屋背石磴相牽攀迎客窮道人俯僂髣

眉斑釋子草一作具羸羸雖貧有餘歡醉一本有三杯徑就午

馳一作登西山去路一作路作九曲彎山禽慣不驚夏木秀且

繁緬懷紫髯公奠玉祠天壇豪彊雄一作有遺韻興廢消毀

無畱觀空崑一泓泉引余掬清甘泉一作眼明崑間至人悲

熱惱遺一作此消昏煩一作驅我茶非世間茶一作天上蒼

月團為爾惜不得烹一作澆晨冷溪出一作谷晚易陰快

亦顏人一作居閑一作柴關不使倒珠玉使一作濟

我胃中慳之官亦漫浪遇勝却一作盤桓平生據頑鈍信

命傲憂患言歸徒旅一作疲就蔭休征鞍

讀中興頌碑

玉環妖血無人掃  
漁陽馬厭長安草  
潼關戰骨高於山  
萬里君王蜀中老  
金戈鐵馬從西來  
郭公凜凜英雄才  
舉旗爲風偃爲雨  
洒灑九廟無塵埃  
元功高名誰與紀  
風雅不繼騷人死  
水部曾中星斗文  
太師筆下蛟龍字  
天遣二子傳將來  
高山十丈磨蒼崖  
誰持此碑入我室  
使我一見昏眸開  
百年廢興增歎慨  
當時數子今安在  
君不見荒涼涿水棄不收  
時有遊人打碑賣

出長夏門

初望龍門

出郭心已清  
青山忽相對  
游人傷流水  
俯仰秀色內  
誰張蒼玉屏  
中斷神斧快  
清伊瀉其間  
銀漢曳天派  
參差樓觀出  
香靄林麓  
邃巖聲答遠  
響水影弄空  
翠同遊得君  
子榮同

教興與煙霞會  
選勝雖自茲  
高懷已塵外

飯昭果寺

飄然乘興遊  
肴酒笑俗具  
僧居致野飯  
草草亦有趣  
山僧慣迎客  
煮茗新泉注  
巖花得春遲  
晚秀見紅素  
蕭蕭野市井  
人物自來去  
溪光送孤舟  
石色照素樹  
題名掃高壁  
歲月記所遇  
書罷迹已陳  
出門猶反顧

石樓

清溪若奔虬  
八鎖束其頸  
奔騰去莫脫  
擺掣恣驍猛  
嘈嘈戰風霆  
萬鼓助其勁  
聲驅石崖動  
氣抱晴日冷  
我來怯初登  
注視久乃定  
悠悠山川濶  
寸目羅萬景  
平生林野趣  
疎放謝鞭警  
會期山月出  
一嘯清夜永

上方



足躡青玉磴躋攀不知勞回頭瞰水抄始覺所歷高孤島  
去滅沒奔溪溪怒號白日當畫梁青雲送微颺坐久神慮  
平微涼清骨毛但驚塵垢容俯仰近赤霄古壁有遺字昔  
人嗟寂寥南風不知暑古木常蕭蕭

廣化遇雨

浮雲蔽高峰臺殿延晚色風聲轉谷豪雨脚射山白東樓  
瞰虛明龍甲排檜栢蕭森異人境坐視動神魄撞鍾寺門  
掩晚霽尚殘滴相攜下山去塵靜馬無迹歸來解鞍歇新  
月如破壁但恐桃花源回舟已青壁

贈無咎以既見君子云胡不喜爲韻八首

平生懷想人握手良未易接君同舍歡此事非此世十年  
淮海夢一笑相逢地投分白首期願言何有既

賢愚譬觀形美醜不自見醫肱待三折劍鐵要百鍊磨君  
古青銅汰揀寄明辨一智出千愚食芹敢忘獻

文風還正始磊落有諸君長者進後生亦使我有聞譬如  
狸與虎偶使並稱文終然不可及困我力空勤

文衰東京後特起得韓子支撐誹笑中久乃化而靡籍湜  
既洒掃後生始歸市丞君拯溺手請效我一指

詩壇李杜後黃子擅奇勳平生執羈勒開府與參軍舉世  
秉筆徒吟哦謾云云安知握奇律一字有風雲

觸有羸其角進有跋其胡膏車秣吾馬白日在脩途雖乏  
無何杯頗多未見書力學致事功良田本澆鉏

黃子少年時風流勝春柳中年一鉢飯萬事寒木朽室有  
僧對談房無妾持帚此道人人事誰令余獨不

南山縛虎師官顧世書字揚眉哦楚喉鼎畔倒侯喜詩聲  
一蒼蠅下到霹靂耳庸庸老尋常物外有奇偉

與潘仲達二首

東風沛甘雨百物一時好江南桃李盡紅紫到百草道傷  
負擔子寒食歸祭禱念我淮上丘三年不躬掃  
淮陽牡丹花盛不如京洛姚黃一枝開眾艷氣如削亭亭  
風塵裏獨立朝百夢誰知臨老眼得到美葵藿

次韻秦觀

璇琰非世珍昔以羊皮換嗟君復何求衆棄乃所玩十年  
少游兄閉口受客難二毛纔一第俗子猶憤惋人間異巧  
拙善琢貴顏汗嬋娟守重閨倚市爭倩盼君胡寶滯貨屢  
辱訪衰懦譬猶臥仆塗更侑觥與散球然瑚璉質磨琢爭  
璀璨遲君三年鳴更用驚我慢

阿几

小兒名阿几眉目頗疎明日來書案傍學我讀書聲男兒  
事業多何必學讀書自古奇男子往往羞爲儒阿几笑謂  
爺薄雲無密雨看爺飢寒姿兒豈合富貴翁家破篋中惟  
有書與史教兒不讀書更欲作何事

宿虹縣驛

長堤溢舟車上下無暫歇煎熬古驛門聒聒爭瑣屑東南  
淮浙富輸餽日填咽楚風習喧卑吳舌動嘲啗平生耽靜  
意投閑劇含噦况茲道路勤強食賦飢渴年來嵩洛興久  
與泉石結終當卜吾廬雲山對華髮

有感二首

昨日鷓鴣作巢今者鷓鴣兒念知三月闌春物行已稀  
風颯不收殘紅怨餘姿回風起輕寒擁爐火重吹燈明夜齋  
靜目澁臨書遲病齒不飲酒持杯勸妻兒豈無兒女心惆  
悵桃李蹊彼昏安目前丈夫方有息  
古今不殊途掩卷獨長想炎爐與死灰相去如反掌彼昏  
誠不知一醉富莫量那知道傷殍是厭益益一金短販  
兒豈暇議得喪但怜反覆閒觀者爲惆悵聖賢蹈大方不  
苟目前妄寄身愛憎間得失真一餉

春雪

天寒城南寺門外無馬迹東風雪疾涓春泥深一尺豈無  
老款段畏蹶不敢策還歸見兒女怕冷不下席楊雄玄未  
就雙鬢颯已白雖云客載酒此意終岑寂功成則有命生  
事亦人力胡爲不自勤守此欲何獲田桑既有裕醪醴亦  
餘溢嗟哉好事客從古百無一

秋感二首

秋日無遠暉秋草無美姿殘蛩弔白日寒鳥悲空枝時節  
一如此余出悵安歸強歌不成音還坐空涕垂感動百慮  
進觸心遂紛披棄拍勿復道日暮眠吾帷

秋山多遠聲日暮尤  
態百風落高樹清澗瀉寒瀨鳴蜩  
默誰憐瘖死不償罪蛩啼獨不巳有慙未逢解天時激汝  
曹寧自知進退吹噓成踴躍芻狗忌徹祭庭空月宵挂圍  
冷露晨沛嗟哉心難忘俯事還感槩

魯直惠洮河綠石作冰壺研次韻

洮河之石利劔矛磨刀日解十二牛千年地因沙磧一

日見寶來中州黃子文章妙天下獨駕八馬森幢旒平生  
筆墨萬金直奇煤利翰盈篋收誰持此研參案几風瀾近  
手寒生秋包持投我棄不惜副以清詩帛加壁明窗試墨  
吐秀潤端溪歙州無此色野人齋房無玩好慙愧衣冠陳  
裸國晁侯碧海爲文辭盤礴萬頃澄清漪新篇來如徹扎  
箭勁筆更似畫沙維知君自足報蒼壁愧我空賦瓊瑰詩  
王晉卿惠詩逾年不報累來見索而王許酒未送因

次其韻督之

酸寒杜陵老痛飲遺身世雲安小縣麴米春遙知美味無  
多子猶令此老氣如虎傲兀幾以醉爲累爭如侯家美酒  
如江湖金鎗犀杓與之俱玉壺滿傾春水快銅槽夜滴秋  
雨疎主人文章足賓客許致翹生來坐側三杯脫帽我家  
風渴如旱田占雨虹冷官如餅君未見腹惟貯水冰生面  
鳴鞭走送煩騶轡坐對朝雲北風起未欲煩公大作讌老  
夫自斟看淺淺

福昌秋日效張文昌二首

秋野無人秋日白禾黍登場風索索豆田黃時霜已多桑  
蟲食葉雷空柯小蝶翩翩晚花紫野鶉啄粟警人起洛陽  
西原君莫行秋光處處傷人情  
黃桑蕭蕭秋水清田中日午村鷄鳴場邊九月禾黍熟空  
原雉飛飽新穀棗籬蟲鳴村路曲道邊古墳生野菊人稀  
田潤草茫茫落陽秋深能斷腸

題韓幹馬圖

頭如翔鸞月頰光背如安輿鳧臆方心知不載田舍郎猶

帶開元天子紅袍香韓幹寫時國無事綠樹陰低春晝長  
兩鬢執轡儼在傍如瞻馳道黃屋張北風揚塵燕賊狂廐  
中萬馬歸范陽天子乘驟蜀山路滿川苜蓿爲誰芳

罔沙阻風

大江春風浪如屋客舟迎風罔沙宿連檣接柂古岸傍岸  
頭無人春草綠船頭日出炊烟起買魚攜菜來就市漁人  
水惡不出門蕭條野市無鷄豚堤邊紙錢灰若雨洗酒賽  
神巫降語南人艇子不避風橫江五兩翩翩去

有感三首

郁城本自貳師謀騎士拔劍猶封侯董生明經守正直白  
首區區相侯國參差世事足嗟歎平聲我笑羣兒較目前可  
能董子之榮辱乃在封侯得失間

羣兒鞭笞學官府翁憐兒癡傷笑侮翁出坐曹鞭復呵賢  
於羣兒能幾何兒曹相鞭以爲戲翁怒鞭入血流地等爲  
戲劇誰後先我笑謂翁兒更賢

南風霏霏麥花落豆田漠漠初垂角山邊夜半一犁雨田  
父高歌待收穫雨多蕭蕭蠶簇寒蠶婦低眉憂繭單人生  
多求復多怨天工供爾良獨難

到陳午憇小舍有任王二君子惠牡丹二槃皆絕品

也是日風雨大寒明日作此詩呈希古

初來淮陽春已晚下里數楹聊寢飯此邦花時人若狂我  
初稅駕遊獨懶任王二君真解事走致兩槃紅紫爛天姝  
國艷照蔀屋持供佛像安敢慢江湖逢春豈無花格頑色  
賤皆可揀誓觀中州燕趙態一洗千里窮荒眼風波歷盡

還故郡此願誰知輒先滿那知中夕忽凜烈卧擁牛衣眠  
失旦名園泥淖安可入坐惜殘芳風雨散東隣夫子亦嗜  
酒卧聽午鷄方起盥晴明猶及一寓目我老尚能揮大醜

次韻答天啓

黃鐘無聲登瓦釜蔡子青衫在塵土逼人爽氣百步寒知  
子胸中有風雨三年河東走馬絕口魚鰕便酪乳歸來  
萬卷付一讀不學兒曹用心苦周瑜陸遜久寂寞千年北  
客嘲吳語莫徒彩筆雲錦張要是寶劍蛟龍舞天兵百萬  
老西北快馬如飛不出戶眼看六蠹出麒麟走取單置  
刃俎

赴亳州教官次韻和中書錢舍人及亳守晁美叔  
贈

久知疎慵難應接勉强一官親訟牒羈窮正似鳩無巢擺  
去不如魚有鬣從來書史鈍蹊徑更歎詩騷窮事業幾思  
狐白易絮纈羞襤舊服求新袂又憐夸毗竟何得把玩區  
區一蚊睫久知趨向合飢寒正藉文章謾嘯嘯紫微丈人  
椽作筆謔得羸師輕傳謀知擒敢慢武侯縱有穿前知魯  
侯歛荒蕪誦編求指摘望以餘光分曄曄乃蒙稱屈力褒  
揚不意糞壤藏諸篋獲如丘陵飽則可良御不悅猶非獵  
平生賞遇有君子處世雖鈍吾知捷清閑得食學官祿願  
以詩書填吻頰才懸喜校鄴侯籤藤織新成沈郎笈晁公  
聲名三十載餘學筆蹤傳淡帖紫芝眉宇望不遠屈指數  
日無旬浹黃衫健步書見賜紫誥除官等何躡久懷薄技  
待後乘宣管盈囊紙來款坐乖前計空惋悵袖裏從今雙

手摩醉歸應被官長贖未飽徒勞方朔憎

蘇叔黨呂知止自許下見訪叔黨有詩戲贈以此奉

答

三年齊安看江山可當中原故人面北來塵埃逢故人眼  
前却作江山見君似江山定不疎能出吾言世亦無蘇郎  
下筆妙無敵呂郎與談驚未識鳳雛驥子未宜輕囊空各  
有千金璧贈君錦繡英瓊瑤報我琅玕金錯刀溪毛潢漥  
未相棄歲暮與君甘緼袍

遊武昌

一葉橫江凌浩渺李君見我迎門笑鵝黃初熟醅旋壓書  
室焚香地新掃林鴻歌笑不知夜竹榻枕藉眠諸少老人  
被暖覺獨晚驚起東南日如燒四明陳子定愛客生火寒

廳邀我到盤肴香潔具俄頃鱸斫寒魚初出沼仲謀霸氣  
久寂寞元子亭基尚危峭荆榛荒梗上石磴人物清江開  
野廟莫投明府快一飲主意殷勤賓屢醕星河破碎歸中  
夜明日清淮理歸棹王家園館靜人眼挂壁於菟疑欲嘯  
殺鷄爲黍辦倉卒看盡烹茶每醉飽還家閉門空寂歷勝  
境目前皆了了茲遊可再誰汝嚮老嬾似不能輕矯西山  
得霜瘦如削蕭寺崢嶸出粉籐幸余腰髀猶足使與子凌  
寒恣遊眺

秋雨小酌贈賈七

出門秋雨泥漫漫嗟哉后土何時乾官曹事休歸舍卧破  
屋淅淅西風寒弱妻傾榼勸我起稚子笑語爭杯盤我生  
樂事但如此爲爾一醉愁腸寬仕塗翩翩巧捷華裾鮮

穀相追攀老來 百事覺羞耻懶伴兒女塗鉛丹賈郎豪華  
獨異我粉腮玉 指雙鵝鬢清眸侑酒醉百醖官咀貧甕寒  
壑酸堂前菊花 日以好落砌撼撼梧桐殘當謀痛飲待九  
日豪氣一壓龍 山桓

寓陳雜詩

朝雨如霧絲咫 尺不相辨俄然晨光漏紺碧出天面天工  
易明晦頃刻俄 屢變今朝事大定雲物卷組練客有北來  
說蠶生被數縣 穀穗無一粒遺稗如立箭甲田成大澤投  
種哀莫見官人 惜不知猶喜輸租辦興懷及鰥寡猶愧吾  
飽飯

開門無客來 永日不冠屨客知我老懶投刺輒復去端成  
雨相忘因得百無慮故人在旁郡書信不能屢興哀東坡  
公將拚郊山墓不能往一慟名議真有負可能金玉骨亦  
逐黃壤腐但恐已神仙裂石終飛去

我不知暑退但覺衣汗乾頗怪庭中天湛然青以寬有物  
叫草根啾啾自相喧問知已新秋大火流金九天工變寒  
暑正爾事亦繁靜觀付一笑吾事寧相關但息筋力健悠  
然佳意還喧喧憎隣里砧杵亂人眠

秦子死南海旅骨還故墟辛勤一生事空得數編書琅琅  
巧言語玉佩聯瓊琚知者能幾人憎者頗有餘書生事業  
薄生世苦勤劬持以待後世何足潤槁枯興懷及平昔使  
我涕漣如道路阻且長悲哉違撫孤

寄李端叔

陳墟自古皇疆野實楚縣沃野接神畿荒溝漕淮甸民風



靜而陋原隰平以遠我來逢艱歲禾黍秋色殘荒居咽蛩  
蚓風雨老蒸菑閉門謝車馬隱几親筆硯馬迹巷泥濘庖  
烟簷日晏淡居窺老易妙理珠自玩困享方寸足夸安勞  
遠願乖離感歲月老色各滿面友道古所敦尺書莫辭倦

秋日曬古城

秋日曬古城西風振塵埃出門何所之壞道連蒿萊飛鳴  
鷄犬稀破屋枯壕隈老圃理蔬畦晚甲瘦未開輪人暮出  
城栖鷄一一回悵然心不怡歸坐勸一杯

孫志康許爲南釀前日已聞糴米欣然作詩以問之  
平生一尊酒風月不可無謫官將十年一醉未易圖市豈  
無旗亭官亦有酒壚薄苦與釀酸一滴不可沾英英孫夫  
子臭味真吾徒自云得異蘖乃出粳稻腴藏久精粹去去  
者乃其粗醞釀纒浹日芳甘已盈壺儂人喻其力若火經  
茅蘆此語真野陋殆出負販夫前日聞吉語糴便已在途  
每恨陳乏糶價直如買珠憐君久客囊傾倒無復餘假器  
走僕僮供我一笑娛欲爲漉巾潛請學滌器如作詩以訊  
之何日陳尊孟

歲暮卽事寄子由先生

歲暮淮陽客貧閑兩有餘朝昏面壁坐風雪閉門居老去  
縱依佛年衰更嗜書未能忘素業聊用慰窮途下里皆貧  
屋開門卽古墟鷄豚來近舍春汲賴鄰夫雪壓移來竹霜  
萎自種蔬烏皮蒙燕几褐帽裹僧顛肉似聞韶客齋如持  
律徒女寒愁粉黛男窘補衣裾已病藥三暴辭貧飯一盂  
長餅卧牆角短褐倒天吳宵寐衾鋪鐵晨炊米數珠大攬

隨杜脛葛製暖寒軀時命今如此功名已矣乎談愁風射  
馬拙待兔逢株久慕真乘樂淡諳夢境虛誰憐九頓首止  
有一長吁瞻望身空老蒼茫歲欲除何當聞妙誨黥刑待  
完膚

贈翟公異

我昔出守來丹陽江流五月如探湯史君之居在山腹繞  
舍樹石何青蒼千年藥根蟠井底靈液浸灌通寒漿人言  
狗杞精變狗夜吠往往聞空廊金山蕩瀾浪花裏一舸遙  
去隨漁郎最奇巖齋人迹少乳水時滴白石牀翠龜坡陀  
負日色白騎掀舞占風祥我畱金山凡十日窮探力取無  
遺忘南風吹我渡江去已厭淮南塵土黃二十年間多少  
事身如疲馬起復僵淮南窮棲衆人後朝食不充藜藿腸

公來衰顏得一笑側聽高論驚尋常窮閭過我坐至暮滿  
懷珠玉無粃糠乃知世間有清議未可盡以已意量精金  
白壁天所寶理無破碎委道旁半年耳冷不聞此遇公矍  
然神激昂論交自顧已老醜從事理絕隨飛翔斯文有屬  
不但爾因公作詩我涕洟

北隣賣餅兒每五鼓未且卽遮街呼賣雖大寒烈風  
不廢而時略不少差因爲作詩且有所警示結柁  
城頭月落霜如雪樓頭五更聲欲絕捧盤出戶歌一聲市  
樓東西人未行北風吹衣射我餅不憂衣單憂餅冷業無  
高卑志當堅男兒有求安得閑

書初涼夜至將曉

靈壽寺作

秋房燈火清人語久已寂城遠不聞更警柝鳴未息橫參

已入地斗柄當天植乃知三更中市廛已寂歷我時守書  
几磨墨傾硯滴反覆小學書昏目如芒刺試尋隣房僧鼻  
齟背負壁體勞徑就枕冷夢分南北覺來寺鐘鳴僧禮像  
前席須臾聞梵唄木魚如叩石舉頭視東牖朝日已淡白  
反身起披衣神爽健筋力亟來酒甕邊側聽聲唧唧

霜後步西園

濃霜乍噴妍短日淡無色回風振中園搖落聲策策草根  
飢鳥啄飛舞時嘖嘖野荒無遺粒卒歲將何食鮮鮮西墻  
下幽草弄寒碧四時不吾欺聊假汝頃刻

呈徐冲車

朝日照高簷夜霜猶在瓦纖纖牆邊柳春色已可把殘年  
能幾何奔馳劇湍瀉雖無功名求衰暮亦悲吒出門問徐  
子兩計決取捨爲當勉自修汲汲不可暇爲當飲美酒送  
老在杯斝子當指我途我卽策其馬但恐懶拙姿終非服  
勤者

讀戚公恕進卷

世方尚纖柔子獨不可揉人皆喜嗷嗷子語不出口巉然  
卽之高俗子競譎詭我嘗要之難快使暴其有乃知謗之  
非更覺所得厚由來難小知此固可大受讀書常辛勤世  
務飽經構琅琅滿編文一一可推究俗儒昧事實文字工  
絲繡可觀不可用章甫冠土偶子能獨不然渾樸謝雕鏤  
寧爲目前玩功見施設後知心古所難形兀實見售嗟君  
聽者寡風雨但孤確又思理難常功業亦邂逅豈令匠石  
斤常縮袖間手無爲扣角歌且進滿尊酌但非遽可合有

所待而偶干將伏黃土氣乃在牛斗顧君久自安蔽抑寧  
復久

贈江瞻道

我行于四方其所急者友嗚呼得之難百不一邂逅人心  
不可齊若十指於手隨其短與長亦各有所取剛或礪而  
折柔有弱而什質良文不揚中美外莫副寬壺泛以枵狹  
盜迫而陋此猶其大槩瑣屑難悉究譬如選長材棄百不  
一有其間雖得之猶或煩矯揉我友居淮濱飲德昔自幼  
豈期羈旅間乃獲聞馨欬嗟君如美玉外徹中乃厚埋藏  
困塵埃要以不可垢他人十不一子乃得八九餘虧能幾  
何不待勉而就乃知昔求艱特以見未久但憂奔莫及敢  
憚喘而走我心子所知濩落無所囿是以行于世往往得  
翻詬人才如其面不自知好醜立之明鑑前乃見其可否  
子於我無嫌告我當苦口我惟於改過竊不敢自後嗟予  
迫飢寒子亦仰五斗何當兩有歸投老作鄰叟

與友人論文因以詩投之

我雖不知文嘗聞於達者文以意爲車意以文爲馬理強  
意乃勝氣盛文如駕理維當卽止妄說卽虛假氣如決江  
河勢順乃傾瀉文莫如六經此道亦不捨但於文最高窺  
不見隙罅故令後世儒其能及者寡文章古亦衆其道則  
一也譬如張衆樂要以歸之雅區區爲對偶此格最汙下  
求之古無有欲學固未暇君爲時俊髦我老安苟且聊獻  
師所傳無以吾言野

寄答參寥五首

昔我初見子子時客京師聞名久不獲既得過所知示我  
一卷書大小百首詩我嗜不可輟熊蹯薦朝飢約子彭城  
游念當行有期中間忽倉卒決去不予辭子後來高郵我  
居淮之湄中間無百里詩句屢交馳客來得子書云子久  
南歸投書不能讀恨我聞之遲使我早知此扁舟尚能追  
遠別不執手近居不相攜每念念恨者耿耿中腸悲子行  
日已南我去日已西音書不可頻何以慰我思  
蘇公守吳興山水方有主子兮從之遊掛錫當可駐塵埃  
困孤鶴念子久失所秋風展其翼道使萬里去青雲引高  
唳爽絕誰敢伍余駒欲西秣使我江海櫓平生二三子往  
往在南土子才得所樂我拙日益魯拳拳相息心契濶不  
得語

秦子我所愛詞若秋風清蕭蕭吹毛髮肅肅爽我情精工  
造奧妙寶鐵鏤瑤瓊我雖見之晚披豁盡平生又聞從蘇  
公復與子同行更酬而迭唱鐘磬日撞鳴東吳富山水草  
木餘春榮悲余獨契濶不得陪酬賡

我生爲文章與衆常不偶其所爲詩不笑卽譎詭少年  
勇自辯盛氣爭可否年來知所避不敢出諸口時時未免  
作包以十襲厚低心讓兒曹默默衆人後見君不能已頗  
亦陳所有君豈少取之時以佳句授幽絃喜有聽清唱慰  
孤奏如何瞥然去使我不得友

蕭蕭江湖客疎瘦若秋竹苦心爲詩章日夜撓心腹清絃  
無浮聲促柱有哀曲湔湔幽巖泉一一清可掬人生於文  
章初苦力不足及其成欲售又困瞽者日子從吳興公乃

獨獲所欲得意有知賞幽懷免窮獨嗟余失所投痛學自  
藏覆子當慰我窮時寄書數幅

夏日雜感二首

羣動入夜息我歸亦安眠脫我身上衣投枕體晏然朝日  
常營營有生不可閑羲和戢其光幸此須臾間人生一世  
中大小無百年胡爲不自暇長抱勤苦歎才者勇設施誕  
者夸死權彼有驅其心欲休諒無緣我本與世疎少慵老  
成頑何爲不引去坎軻行所艱  
娟娟簷前月雖缺自媚好團團理絲盡養身恃其巧無能  
老蝙蝠乘夜出堂奧那能捕飛蚊未解聒耳鬧悲歌草間  
蚓辛苦自鳴噪爾生可以默何所欲而躁鳴哇訴其渴謂  
若天可禱瘖蟬死不鳴豈以訴無效悠悠羣動情誰得辦

醜好我歌豈徒然亦用自警告

西華道中

我行陳許郊十里平若掌居民雜荆榛耕少地多曠野兔  
作跳奔驚鳶或高颺喬林多疾風寒澗有餘漲棘籬蔽茅  
屋鷄犬入村巷主人掃土塌秣馬具朝餉童兒汲土井敗  
飯堆瓦盎勿悲爲生陋自足無他望嗟余走薄官奔走年  
將壯長抱羈旅愁何時稅歸鞅

讀蘇子瞻韓幹馬圖

我雖不見韓幹馬一讀公詩如見者韓生畫馬常苦肥肉  
中藏骨以爲奇開元有臣善司牧四十萬匹屯山谷養之  
罕用食之豐力不曾施空長肉韓生圖像無乃然我謂韓  
生巧未全君不見昔時騏驥人未得飢守鹽車唯有骨昂

藏不受塵土侵伯樂未來空佇立騏驥乏食肉常臞韓生  
不寫瘦馬駒誰能爲驥傳之圖不如凡馬飽青芻

再和馬圖

我年十五遊關西當時唯揀惡馬騎華州城西鐵驄馬勇  
士十人不可羈牽來當庭立不定兩足人立迎風嘶我心  
壯此寧復畏撫鞍躡鞵乘以馳長衢大呼人四走腰穩如  
植身如飛橋邊爭道挽不止側身逼墮壕中泥懸空十丈  
才一擲我手失轡猶攢蹄迴頭一躍已在岸但見滿道人  
嗟咨關中平地草木短盡日散漫游忘歸驅馳寧復受鞭  
策進止自與人心齊爾來十年我南走此馬嗟嗟入誰手  
楚鄉水國地卑汗人盡乘船馬如狗我身未老心已衰夢  
寐時時猶見之想圖思畫忽有感况復慷慨吟公詩達人

遇境貴不惑世有尤物常難得寧能使我卽無情搔首長  
歌還歎息

再寄子由先生

宛丘之別今五年汴上畱連纔一日賤生飄泊客東南憂  
患侵陵心若失先生神貌獨宛然但覺巖巖瘦而實有如  
霜露入秋山掃除繁蔚峰巒出自言近讀養生書頗學仙  
人餌芝朮披尋圖訣得茯苓云是松間千歲物屑而爲食  
可不飢功成在久非倉卒上侔金石免毒裂下比草木爲  
強崛涓涓漱納白玉津鍊以真元納之骨神仙自是人不  
知豈爲難求廢其術我聞公說心獨嗟欲問太虛窮恍惚  
奈何不使被金朱乃俾枯槁思巖窟又觀世事不可常倚  
伏誰能定於一終身軒冕亦何賴况有朝升而暮黜何如

端坐養形骸壽考康寧無天屈乃知豈卽非良圖却笑兒  
曹嗜糠粃青衫弟子皆授經賦分羈窮少倫匹自知無命  
作公卿頗亦有心窮老佛但思飽暖願卽已妄意功名心  
實不終期策杖從公游更乞靈丸救衰疾

寄楊應之

應之蹉跎三十九猶着青衫困塵垢高才逸氣老益奇我  
每事之安敢友逢時則駕子何患有才未用誰之醜暴得  
從來失常速徐驅未用鞭其後掃除萬事付諸命收拾至  
樂歸之酒聞公頗以飲自名我亦抗衡能至斗京師常恨  
酒不足貧旅僅得糊其口乃知一飲尚關功垂萬古知  
難偶百年痛飲乃良圖安用金朱裹枯朽我生自斷計已  
決君亦我徒能爾否楊眉鼠子事輕肥眨眼小兒夸謹厚  
須防仰赫忌鷓鴣更慮致麗逢芻狗獨醒不若餽其糟羣  
犬猶須避而走遭刑每笑嵇叔夜得計須師彭澤叟我官  
古邑洛之陽聞有山川亦清秀行當釀秫從子遊更以新  
詩相獻侑

招潘郎飲

老人夜短睡不足勃公窗外強知時五更未明語千萬更  
憎林間鴨鳩兒吹紅洗白雨三日吾園花蕊已離披一年  
春事坐如此白首窮謫歸無期念此徑須沽酒飲買魚烹  
肉勲妻兒更呼東鄰好酒伴爲我醉倒堦前泥

郭圃送蕪菁感成長句

蕪菁至南皆變菘菘美在上根不食瑤簪玉筍不可見使  
我每食思故國西鄰老翁知我意盈筐走送如雪白蒸烹



氣味元不改今晨一食如南北孔明用蜀最艱窘百計措  
拾無遺策當時此物助軍行渭上褒中有遺植英雄臨事  
究瑣屑終服奇才屈強敵想見躬耕自灌畦當時有意誰  
能測

讀守道詩

仁宗之初公有聲一世儒者聞之驚力行古義不顧俗師  
事孫子傳其經掃堂捧杖俱賤役侍師之坐隨師行質疑  
問道無敢變當世始知師與生作爲文章不徒發譏切時  
事排公卿俗儒毀譽無所出乃取過行爲譏評過於仁義  
罪固小矯弊自合違中行人皆不及子獨過兩者之罪誰  
爲輕開編偶誦子詩句辭氣磊落嚴以清吟哦令我不能  
捨想見眉宇寒崢嶸高風一泯不可見安得壯士能經營  
惜哉朽骨不可作徂徠廢土知誰耕

對雪呈仲車

學堂歲暮無來客殘雪漫漫風獵獵當庭古柳三四株老  
翁攜帚收殘葉二年閑散百事慵飢寒不自勤鉏鍤囊空  
甌倒誰復救典衣買酒將空篋人間萬事苦難齊以醉驅  
愁最奇捷丈夫未死誰能測幽憂何自同兒妾飲酣耳熱  
詩興適直上虛空恣陵躡飢喉凍噤誰與解正藉醺酣得  
嚙嚼少年舉白未嘗辭漸老深杯見還怯何當共有種秫  
田免向官廬走書帖

巳未四月二十二日大雨雹

夜來飛雹驚我眼大者磊落幾如拳起聽但覺屋欲動簷  
瓦破墜無復全是日晚晴星斗出鏡靜萬里無雲烟乾坤

變化竟誰使造作詭怪須臾間鄰家老翁髮已白云昔見  
此今十年木衰火濫氣浮洩激此陰沴成冰堅儒生臆度  
知是否天事誰得窮其源屋頭雛鴉失其母足傷翅折亦  
可憐

早作

鷓鴣夜寒不得眠永夜相語高樹顛鴉鳴最早尤喧闐啼  
呼相應動百千老鷄睡起足攣拳側頭端如聞九天引吭  
一唱鳴宮懸時哉不後亦不先朦朧初日見山川吾廬人  
起有炊烟

讀李愷碑

自唐中微北方沸 馬長鳴飲清渭李公守節陷賊庭身  
死羈縻行萬里 愷及盧奕  
並傳首 百年事往誰復省一丘條莽無

人祭荒碑半折就磨滅後人空解傳其字殺身不畏真丈  
夫自古時危知烈士俗書小技何足道嗟我但欲揚其事  
寥寥獲麟數千載末學褻貶多非是高文大筆誰復作紉  
臣餓夫須有待紛紛後世競著述紙墨徒爲史官費却嗟  
何獨此事然搔首碑前空嘆慨

秋蔬

荒園秋露瘦韭葉色茂春菘甘勝蕨人言佛見爲下筍 俗  
言  
八月韭  
佛開口 芼炙烹羹更滋滑其餘鎖屑皆可口蕪菁脆肥薑  
菘辣藏鞭籬筍纖玉露映葉乳茄濃黛抹已殘枸杞只畱  
辨晚種萵苣初生甲南來食魚忘肉味久息吾土牛羊苗  
軟炊一飽老有味痛飲百壺今不說蒲團齋罷欠申時自  
覺少年心解脫

瓜洲謝李德載寄蜂兒木瓜筆

瓜洲蕭索秋江渚西風江岸殘紅舞津亭永夜守青燈客  
睡朦朧聽江雨青罇曉酌遣懷抱但恨鬱鬱將誰語敲門  
忽得故人書洗手開緘見眉宇蜂兒肥膩愈風痺木瓜甘  
酸輕病股銛鋒皓管見還愧老去筆硯生塵土北歸飄泊  
亦何事篙工已束橫江櫓天寒應客太吳墟當遣何人具  
鷄黍

未寒熱伏枕已數日忽聞車騎明當按頓睡中得韻

語數句上呈四丈龍圖兼記至日之飲

山羊卷酥如切玉剪毛胡羊花作肉燭前醉客淋漓時山  
泉更煮如珠粟淡泥三尺歸不記日到牀前初睡足爾來  
七日戰寒熱朝飯齋糜不盈掬客來但辦君且去卧聽洎  
消雪消屋因山事嚴京兆出十驛人人如在日馳裘便面  
行野時晴郊已動陳根綠

和晁應之憫農

南風吹麥麥穗好飢兒道上扶其老皇天雨露自有時爾  
恨秋成常不早南山壯兒市兵弩百金裝劔黃金縷夜爲  
盜賊朝受刑甘心不悔知何數爲盜操戈足衣食力田竟  
歲猶無獲飢寒刑戮死則同攘奪猶能緩朝夕老農悲嗟  
淚沾臆幾見良田有荆棘壯夫爲盜羸老耕市人珠玉田  
家得吏兵操戈恐不銳由來殺人傷正氣人間萬事莽悠  
悠我歌此詩聞者愁

九月十二日入南山憇一民舍冒雨炙衣久之

石稜如刃不容步上挽垂藤下無路風寒雨滑徒旅愁捨

馬杖藜泥沒屨躋攀顛墜不容髮目眩心寒驚反顧亦知  
垂堂有遺戒身仰微官欲誰愬蕭蕭茅屋映絕壁門外澗  
澗清泉注解衣就火不能暖旋拾山薪伐溪樹山翁生未  
食醯醢脫粟寒蔬度朝暮人間平地画不少何用熾嘔守  
麋兔秋聲四起山靄夕壞屋疎籬睡無處披裘結束相勸  
歸過盡重雲下山去

蕭朝散惠石本韓幹馬圖馬亡後足

世人怪韓生畫馬身苦肥幹寧忍不畫驥骨當時廐馬君  
未知開元太平國無事戰馬卷甲飽不騎玉關橐駝通萬  
里長安第宅連諸姨笙歌錦繡遍一國六龍長閑空食粟  
霜甜秋草沙苑遊日暖春波渭川浴雕圓腰穩目生光細  
尾豐膺毛帖肉珠鞍玉鞿驕不行豈有塵埃侵四足韓生  
丹青寫天廐磊落萬龍無一瘦豈知車下骨如牆飢齧草  
根刺傷口君家古圖才半身千里騰驤已有神迴身側顧  
不無意剪鬣絡頭嗟失真君不見太宗戰馬拳腹毛身騎  
此馬縛羣豪龍虎精神金鼓氣豈有閑地供脂膏至今畫  
圖快宵臆想見虬鬚親破賊那知但愛廐中肥漁陽筋脚  
蹄如石神駒入水隨烟雲蜀山石路無行人六驥悲鳴足  
流血騎驟遺事一酸辛

次韻君復七兄見贈

老知山林等朝市扁舟誰能問行止長淮十日浪吹沙春  
風正攪驪龍睡幽人軟語破永日衝泥攜手林間寺坐中  
知兄病當已眉宇氤氳有怪氣華池神酒不用醒人生和  
暢自忘形扶持陰德鬼神在洗除世緣煩惱輕東來自慙

雙鬢改相逢獨覺兩眼明論詩尚愛淡生活學道久嘆閑  
名聲嗟我塵埃費昏旦補刑自憐聞道晚還丹欲問僕僕  
仙謂陸先生僕僕古仙人也一菴更伴騰騰騰騰古禪宿謂圓明春陰夜薄月  
朦朧劇談燭盡樽亦空他日重逢龐處士可能猶與世人  
同見斷愛屏欲專意禪悅故比龐公

離泗州有作

舸艤大艚來何州翩翩五兩在船頭淮邊落帆汴口宿橋  
下連檣南與北南來北去何時停春水春風相送迎沙岸  
飛鷗舊相見短亭楊柳不無情清歌一曲主人酒主人壽  
客客舉手明日酒醒船鼓鳴沙邊破堞不知名行人十里  
一迴首雲邊猶有增亭亭

汴上觀迎送有感

居人憐客千里來掃堂爲客致酒杯夜闌再拜客辭去樽  
前美人不成舞陽關八疊倒玉船消魂此地自年年船頭  
旂竿船尾桅南遊江海北長安長亭出城十餘里柳邊人  
家飯遊子少年此地幾經過白頭相逢可奈何

奉先寺

荒涼城南奉先寺後宮美人官葬此角樓相望高起墳草  
間栢下多石人秩甲焚骨不作塚青石浮屠當丘壠家家  
墳上作亭亭朱門相向無人聲樹頭土梟作人語月黑風  
悲鬼搖樹宮中養女作子孫年年犢車來作主廢后陵園  
官道側家破無人掃陵城官家歲給半千錢街頭買餅作  
寒食

送程德孺赴江西

程侯治楚我獨知去時民作嬰兒啼歸來明光見天子還  
把一節大江西年來屢下寬大詔赤子未免寒與飢恩如  
憂病政如藥知病無藥何由治朝廷法度寄吏手付授得  
所乃合宜事如白黑初易賂敗以容悅相蒙欺此行委寄  
意不淺列城數十受指麾任官輕外最弊法省閣無補真  
何爲遙知敏手多暇日不廢樽俎還蛾眉從君多乞歛州  
紙歲晏天祿供吟詩

叙十五日事

五更聞鐘自驚起坐守殘燈具冠履昏昏病眼正團花獨  
愛當庭月如水強驅睡味誰不仁漠漠黑甜畱兩背忽驚  
左掖漲風埃已趨上閣鏘環珮平明原廟煥金碧飢投敗  
幕食寒餌紛紛僕僕酸兩脛肉食當然賤何事走馬還家

百不問掃榻伸腰真有味起來炊熟日亭午槐葉新成庭  
覆翠翻書弄翰老自笑飽食安眠計難遂古來高士不入  
城官聽鳴鷄踏朝市

官閑

官閑吏歸早歲晏寒欲盛槐稀庭日多鳥下人語靜幽花  
破寒色過雁驚秋聽酒賤莫厭沾北風行欲勁

冬日放言六首

小兒喜學書滿紙如棲鴉老婦寒不續當戶理琵琶樽中  
有神物快寫如流霞三杯任兀兀凍臉生春華

寒羊肉如膏江魚如切玉肥兔與奔鷄日夕懸庖屋嬉嬉  
顧妻孥滋味喉可欲謫官但強名比者何不足

日暮歸飲酒兒女戲我前須臾徑三酌據榻已醺然老妻

坐我傷餽敵屢炮煎大勝劉伶婦區區爲酒錢  
我初謫官時帝問司酒神曰此好飲徒聊給酒養真去國  
一千里齊安猶最醇失火而遇雨仰戴天公仁  
秦人焚詩書意欲遂絕滅六經至今存何曾損毫髮興衰  
有天理人力自淺拙不憂驪山墓回首遭發掘  
元子本豪爽頗復有俗氣孟嘉亦可人乃與較權勢崛強  
盡百年究竟成何事江左無英雄汝得免徒隸

潘郎以予生日見過致酒出兩詩

東風沛甘雨百物一時好江邊桃李盡紅紫到百草道傍  
負擔子寒食歸祭禱念我淮上丘二年不躬掃  
淮陽牡丹窟盛不數伊洛姚黃一枝開衆艷氣如爍亭亭  
風塵表獨立朝萬萼誰知臨老眼更復美葵藿

嘲南商

兩袖全正帛望知江淮客深藏計算苦好鬪意氣窄愁逢  
湯餅盃遇鮮論甕昨市南沽茅柴歸店兩顴赤

十二月二十六日旦聞東堂啄木聲忽記作福昌尉  
時在山間環舍多老木臘後春初此鳥尤多聲態  
不一今琵琶箏中所效既不類又百不得一二云

福昌河南屬邑也

墮起聞啄木忽憶福昌春官舍題詩壁如今經幾人猶能  
老耽酒依舊拙謀身尚想蘭宮路東風清洛濱

田家三首

野塘積水綠可染舍南新柳齊如剪去冬雪好麥穗長今  
日雨晴初擇繭東家饋黍西舍迎連臂踏歌村市晚婦騎

夫荷兒扶翁月出橋南歸路遠

社南村酒白如餽鄰翁宰牛鄰媪烹插花野婦抱兒至曳杖老翁扶背行淋漓醉飽不知夜裸股掣肘時謹爭去年百金易斗粟豐歲一飲君無輕

新見鵲銜庭樹枝黃口出巢今已飛粟畱啄椹桑葉老科斗出畦新稻齊田家苦作候時節汲汲未免寒與飢去來暴取獨何者請視七月商人詩

海州道中二首

孤舟夜行秋水廣秋風滿帆不搖槩荒田寂寂無人聲水邊蹴魚翻水響河邊守罾茅作屋罾頭月明人夜宿船中客覺天未明誰家鞭牛登隴聲

秋雨多水滿轍渡頭鳴春村徑斜悠悠小蝶飛豆花逃屋無人草滿家纍纍秋蔓懸寒瓜

女兒祠下

山邊白雲閑不掃山下松花龍甲老東風古栢吹暖香廟前土馬荒春草朝霞爲裳水爲珮守廟千年老龍在清風掃堂神暮還山頭月出溪潺潺

福昌北秋日村行

秋野無人秋日白禾黍登場秋索索豆田黃時霜已多桑蟲食葉畱空柯小蝶翩翩晚花紫野鶉啄粟驚人起洛陽西原君莫行秋光處處傷人情

黃桑蕭蕭新雨晴田中日午村鷄鳴場頭九月禾黍熟空原雉飛飽新穀棘籬蟲鳴村路曲路邊古墳生野菊人稀



田澗草茫茫洛陽秋淡能斷腸

從黃仲閔求友于泉

炎暑戰已定清秋當抗衡碧雲生雁思幽草見蛩情  
村墟靜觀書枕簟清誰能酌玄酒來破屈原醒

借一韻

贈陳履常

勞苦陳夫子欣聞病肺蘇席門迂次數僧米及時無旨蓄  
親庖急青錢藥裹須我場方不給何以繫君駒

至安化驛先寄淮陽故人

蕭條安化驛倦客思悠哉積水連天澗青山送客來疎籬  
風捲葉敗屋雨生苔寄語淮陽舊人今放逐回

秋日

隕葉鳥不顧枯葉蟲莫吟野荒田已獲江暗夕多陰夜語

聞山雨無眠聽楚砧弊裘還補綻披拂動歸心

發安州作

積雨陂塘秀南風高艾肥鳥健立橫隴白鳥下澗畦雲木  
叫杜宇曉林啼竹鷄平生倦游興賴有濁醪攜

都梁亭下

金塔青冥上孤城蒼蒼中淺山寒帶水旱日白吹風人事  
劇翻手生涯真轉蓬高眠待春漲鮭菜伴南公

二月二日艤舟徐城戲呈戚郎

自嗟爲客久羈旅過淮時雪野挑蔬瘦霜天暖酒遲流年  
下坡轂萬事覆杯碁異日懷陳迹孤舟近古祠

舟中曉思

樹色未啼鳥槳聲初度航客燈青映壁城角冷吹霜飄泊

年來甚羈游情易傷年豐清潁尾吾計亦差良

酬同年徐正夫司戶時公欲卜築嵩洛間

少別老相見無言空惘然功名屬多病詩酒樂衰年金厭  
顏公粥囊須趙壹錢歸裝何日辦嵩少好林泉

今早將飲酒聞鶯有感

蕭條古蘭若春日等閑斜唧唧初聞鶯忽忽又過花舊游  
都似夢到處卽爲家把酒聽鶯處羈懷感歲華

破幌

破幌一點白卧知千里明低窗通雪氣喬木尚風聲傳警  
軍城靜鳴鐘梵刹清高眠尋斷夢鄰樹已烏驚

卷簾

卷簾新月上林影散微茫庭草鳴蟲近風燈秋幌涼長年

唯有病晚歲苦多傷身世竟何就吾將問蜀莊

日落

日落長雲暗風悲古岸秋渚鷗遙避客野蝶戲隨舟疎拙  
資微祿飄零朕遠遊若無尊裏酒何物與消愁

舟行卽事二首

古岸生微靄空林掛夕陽霞輝明野色天影戰波光集鳥  
村墟暗鳴蟲禾黍荒秋高孤月靜天末巧雲長沙晚橫歸  
艇川晴列去檣登臨自多感何必寄他鄉

去去路日遠行行歲向深晚田荒更澗秋野曉多陰岸蓼  
飛寒蝶汀沙戲水禽迎風蘆顫葉眩日棗裝林早蟹肥堪  
薦村醪濁可斟不勞頻悵望處處有鳴砧

秋懷次韻晁應之三首

木落晚風急宵涼侵暑衣有期惟向老無計未成歸只益  
顛毛脫還從髀骨肥感時仍弔古回首意多違  
衰鬢不堪洗病軀先覺陰天寒白日短歲暮亂山淡薄酒  
醒無力危絃奏不禁謀身老逾拙三聽洛陽砧  
清秋萬里興力疾上高臺歲熟雉兔飽風高榆柳摧晚篁  
元自綠幽菊爲誰開寂寞無人問鄉書久不來

宿銅陵

山色日已遠聞人歸路長碧天涼後潤秋物雨餘荒人靜  
路傍寺鳥啼林下房銅陵竟何就空死漢吳王

漣水

孤州逆水上野靜聞水聲鷗飛不遠水寒浪濺霜翎夜氣  
岸兼木夕光潭照星長吟弄雙槳知有魚龍驚

索莫

索莫歸未得閑雲還滿空愁吟對寒日不睡到晨鐘衣喜  
初冬寄書憐手自封何當聽夜雪暖酒夜爐紅

冬夜

山靜寒雲薄天空孤月明霜桐占塔影風葉繞廊聲經濟  
心難就蹉跎歲屢更冥鴻本清遠何事亦宵征

和西齋

山色俱開鏡溪光照掩扉暗蟲先夜響萎葉近秋飛灌壠  
晴蔬出閑籠暮鶴歸鳴琴坐朗月輕露點秋衣

春寒

客舍逢桃李清尊聊自懽夢中驚夜雨醉裏度春寒草色  
遠還綠鳥聲晴更繁預期多病眼花發更辭看

歲暮書事五首

歲晏北風疾山空萬谷號木枯隨意折鴻斷不成高  
深屋支蓬戶爇爐暖緼袍老天元不寐鳴竹鼓蕭騷  
風捲塵沙白雲飛雪意凝夜山時叫虎晚市早收燈  
圍粟炮還美村醪醉不能三年官况味真是冷於冰  
牛羊已歸去殘照滿山陂霜雁田中靜風鳶木杪悲  
川原今自若龍虎昔交馳丘隴耕桑盡千年不復知  
原廟依岡起傳聞世祖營南陽無雉雉熊耳合投兵  
霜日蓬原路天風柏殿聲山川英氣在不負昔聞名  
北風吹馬疾石徑上危基野爨飽貍脯山鑪煮橡靡  
寒耕敲凍石獵火上風枝畱滯親麋鹿多慙髮欲絲

莫春三首

還將多病眼冉冉對殘春啼鳥日求侶晚花如向人物情  
懶着意杯酒最關身亦有功名志吾生付大鈞  
應接非吾事淡幽興有餘筍淡鳴鳥下花薄午風疎草淺  
見飛雉溪清生細魚端居亦多趣不用席門車  
紅點薔薇架綠深桃李蹊語鶯知果熟忙燕聚新泥節物  
有常態羈游無定棲寧須說鵬鷁物理固應齊

宿東魯父店二首

夕陽低欲盡春淺色蕭條暝色催歸牧炊煙向晚樵疎星  
臨水際遠火隔村橋黯黯柴門夜栖鴉對寂寥  
郡國何時極羈愁觸處生望隨天不盡春共野兼平煙樹  
淮南濶漁鹽楚俗輕飄零五年別歎息鬢毛更

春望

鳥去晴雲外帆歸芳草邊平淮分綠野春樹接低天殘枿  
寒餘燒新青雨後田年來千里目容易淚雙懸

夜意

荒城轉五更北斗向誰傾穴闕時爭齧林栖或自驚老來  
神慮淡睡足骨毛輕石磬催僧粥低窗枕畔鳴

春望

暖日晴薰草清淮澗浸天地卑連遠水城廢入春田目極  
風燈外愁懸淚臉邊人生苦多感花柳自年年

同七兄及崧上人白墳莊還寺

和風快人意岸幘晚衿涼日落野痕碧月生淮際光論詩  
得靈運靜語屬支郎不是耽閑散從來懶性長

蔡河漲

渾渾雖未已浩浩竟東歸澗處長天近澄邊一鳥飛西風  
疎葦亂斜日遠村微淹泊從吾道扁舟伴釣磯

初秋對雨

閉戶理殘編疎慵得自便朝涼清病思秋雨對高眠屋冷  
深藏燕槐疎濕抱蟬所忻堂下菊芳意已鮮鮮

泊長平晚望

川穩夷猶棹春歸杳靄天翠淡交岸樹綠遠望川田漁酒  
數家市帆檣何處船登臨一回首無恨亦依然

發長平

歸牛川上渡去翼望中迷野水侵官道春蕪沒斷堤川平  
雙漿上天濶一帆西無酒消羈恨詩成獨自題

夏日五言十二首

過雨芰荷亂繁陰竹樹多雜聲知鳥哺萍動見魚過細逕  
饒苔蘚陰牆引薜蘿角巾從倒側疎懶欲如何  
蚓壤排晴圃蝸涎印雨階花鬚嬌帶粉樹角老封苔問字  
病多忘過隣慵却迴晚涼還盥櫛對竹引清杯  
山雨晴來暑溪雲暗復興林塘陰不解巾几潤還蒸書帙  
慵披蠹槃食厭撲蠅老來疲茶甚多病日侵陵  
朝雨來還密村墟一望閒遠聲唯野竹潤色但青山書史  
供高臥莓苔只閉關蕭蕭覺秋興飄颻近衰顏  
細徑依原僻茅蓬四五家山田來雉兔溪雨熟桑麻竹籠  
辰收果茅菴夜守瓜頗知農事樂從此問生涯  
養拙貧無事澹幽樂更真簷巢偷哺子樹啄巧藏身竊果  
營知主移居蟻過隣老夫朝食美薦俎有谿鱗

謝守常搜句陶潛亦效官傍溪分水細過嶽得天寬布種  
隨蔬隴尋香到藥欄野裝兒稚笑繩屨鹿衣冠

久與山川約那無風月情經營元濶畧踈放自平生山友  
招相見鄉書向遠征慙勤語歸計貧病苦難成

種藥幽人事還披本草經出山拋舊翠過雨有新青術受  
壺中秘方傳肘後靈不辭勤服餌爲變髮星星

陶令拋官易龐公去隱深由來浮世事可見昔人心卜築  
閑多思奔馳病不禁簷楹來鸞雀鸞鶴自山林

蛩怨青莎老螢飛積水深庭除延夜色砧杵發秋心雄劍  
鳴初匣寒衣補硬針老來詞賦懶從使二毛侵

夜色川原合秋聲草木催星辰隨地濶河漢寫山來栖鶴  
涼先警飢鳥夕未回高樓對斜月鳴笛正清哀

蒙恩除奉常有感

平生秉周禮投老奉龍旂  
斥逐偶不死歸來敢恨遲  
門闕走賓客行李飭妻兒  
又踏長安道多慙鬢有絲

冬日雜興六首

小園晴自掃曝日坐前軒  
野鼠穿山葉寒鳥啄草根短籬  
藩隙地別逕入孤村幽趣供  
岑寂淹留不復論  
水落橋痕在沙乾岸草枯  
霜餘槐老壯風際竹清疎  
啄木高逾響鶴鳴飛且呼  
二年親友絕唯有對禽魚  
池館留餘雪西山照夕曛  
臘催梅蕊近春向鳥聲新  
愁思仍當病風光欲近人  
年年桃李樹相對只傷神  
空山身欲老徂歲臘還來  
愁怯年年柳傷心處處梅  
綠蔬挑甲短紅臘點花開  
水雪如何有東風日夜回

南壁蒼崖壯窮冬井落閑  
風聲先老樹日色避諸山  
落雁飢相向啼鳥夕自還  
微微寒月影蓬戶已深關

擊柝山城閉疎燈野店扁  
疾風鳴夜谷晴水動浮星  
霜翼歸何晚鄰機織未停  
短歌時自和愁絕更誰聽

建平途次

野橋田徑滑官路柳條新  
流水伴遲日野花留晚春  
點空知去翼衝綠有歸人  
自笑諳岐路無勞更問津

北橋送客

橋上垂楊繫馬嘶橋頭船  
尾插紅旗船來船去知多少  
橋北橋南長別離亭上幾  
傾行客酒遊人自唱少年辭  
百年回首皆陳迹浮世飄零  
亦可悲

九日獨遊懷故人

故人分散在天涯九日登臨獨嘆嗟人世光陰催日日鄉  
閨時節自家風煙滿眼臨秋盡鼓角荒城送日斜取醉  
憑誰正烏帽遣愁猶強插黃花

夜

木落風高砧杵傷孤城更漏入秋長寒生疎牖人無夢月  
過中庭樹有霜報落梧桐猶墮葉知時蟋蟀解親牀年年  
多病渾無寐靜對楞 一炷香

春日

輝輝暖日弄遊絲風軟晴雲緩緩飛殘雪暗隨冰筍滴新  
春偷向柳梢歸可憐客鬢蹉跎老每惜梅花取次稀何事  
都城輕薄子買驪酤酒試春衣

探春有感二首

出城但怪風光老草色蒼茫柳色深煙樹遠浮春縹緲風  
光不動日陰沉芳郊未厭縈紆入美酒何妨取次斟羸馬  
青衫亦何事一生空負野人心

柳萼蒙茸待放綿櫻桃新葉大如錢深春冷落花殘後寒  
食朦朧月淡天獨坐每將詩作伴遣愁安得酒如泉傷心  
千里休凝望城外東風草滿川

暇日同孫畢二同舍遊李氏園亭

蕩蕩東風散客心出門驅馬問園林花房待暖徐徐放柳  
色隨春旋旋深城郭遠來無俗客松篁深處有幽禽主公  
畱壁題詩句應許騷人盡日吟

暮春

夜雨輕寒拂曉晴牡丹開盡過清明庭前落絮誰家柳葉



裏新聲是處鶯白髮生來如有信青春歸去更無情便當  
種秫長成酒遠學陶潛過此生

將至壽州初見淮山二首

浩蕩平波欲接天天光波色遠相連風鳴兩槳初離浦岸  
轉青山忽對船澤國秋高添氣象人家南去好風煙步兵  
何必江東走自有鱸魚不直錢  
晚繫孤舟古岸隈蒹葭風定渚鷗回山兼野色蒼茫去月  
向淮心晃蕩來秋色解將愁並至年華偏與客相催青衫  
手板徒勞爾富貴功名安在哉

將別普濟二首

老松疎竹寺門幽九月輕寒襲客裘漠漠淮煙天際晚蕭  
蕭山雨坐中秋風前紅葉知時落籬下黃花對客愁爲語

老僧無我笑此生終待老林丘

孤城淮北晚鐘殘落日橋邊送客鞍物外樓臺秋更豁山  
溪松竹晚多寒窗風細細侵衣冷簷雨蕭蕭到夜闌佳境  
欲畱嗟不可塵埃蹤跡但悲歎

發泗州

萬艘獵獵戰風桅我亦孤舟別岸隈漠漠曉雲生木末蕭  
蕭飛雨送帆開消磨歲月書千卷零落江湖酒一盃因病  
得州真漫爾功名於我亦悠哉

夏日雜興二首

墻下溪流清且長夾溪喬木雨蒼蒼裊風翠果擎枝重照  
水圓荷舞葉涼蝸殼已枯黏粉壁燕泥時落汚書牀南山  
野客閑相過贈我能攜藥滿筐

疎圃茅齋三畝餘溪光山影動浮虛病妻老去唯尋藥稚  
子年來解愛書中散無堪心放蕩馮君已老興蕭疎全真  
養素安吾分敢謂軒裳不我如

送楊補之赴鄂州支使

相逢顧我尚童兒二十年來鬢有絲涕淚兩家同患難光  
陰一半屬分離扁舟又作江湖別千里長懸夢寐思何日  
粗酬身世了卜鄰耕釣老追隨

送楊念三監簿侍行赴鄂渚

楚天南去水冥冥鄂渚悠悠到幾程京洛信稀千里隔江  
湖春盡一帆輕莫辭送別青春滿會是相逢白髮生飽讀  
詩書取卿相不應如我老無成

寄榮子雍二首

東風三月洛陽城傾蓋相逢氣倍增看盡園花方信馬飲  
斜樓月更挑燈年光飄忽雙馳轂心事蕭條一老僧酒病  
年年慵把筆新文寄我苦憑陵  
家家新酒滴新醅殘歲崢嶸春欲回霜野寂無新到雁雪  
林寒有欲開梅關河路永雙橫轍天地身閑一舉杯酬答  
風光千點淚怯將愁眼更登臺

陳履常惠詩有曾門一老之句不肖二十五歲謁見  
南豐舍人於山陽始一書而褒與過宜陽有同途  
至毫之約束以病不能如期後八年始遇公於京  
師南豐門人唯君一人而已感舊慨歎因成鄙句  
願勿他示

南豐塚木已蕭蕭猶有門人守一瓢文彩自應傳壺奧典

刑猶可想風標紛紛但見侏儒飽寂寂誰歌隱士招十載  
弊冠彈未得簪纓知復爲誰影君知已甚多未聞特達之  
薦可無嘆耶

泊舟候水

一水悠悠斷復連卸帆終日小灘前青旂招飲篙工醉五  
兩欹風賈客眠樹色遠分芳草路鳥行斜斷夕陽天漁舟  
慣伴危檣宿饋我霜鱗不用錢

同李十二醉飲王氏牡丹園二首

東風窮巷只埃塵誰見城南萬朶新不問主人聊一飲爲  
攜佳客送餘春比君意氣三年老貸我疎狂一味真醉裏  
尚能馳馬去看君倒著接籬巾

吹盡紛紛桃李塵天香國豔一翻新正過穀雨初晴日分  
得西都大半春舊態似推新豔好紅芳不似淡粧真予嗟  
久得丘園意何日相逢一幅巾

晝卧懷陳三時陳三卧疾

睡如飲蜜入蜂房懶似遊絲百尺長陋巷誰過居士疾春  
風正作國人狂吟詩得瘦由無性辟穀輕身合有方欲餉  
子桑歸問婦一瓢過午尚懸牆

將至海州明山有作

望望孤城滄海邊好雲淡處是人煙鳥飛山靜晴秋日水  
瀾人閑熟稻天旂影遠搖沽酒市棹歌歸去隔村船功名  
富貴非吾事誓斲明山數畝田

秋日登海州乘槎亭

海上西風八月涼乘槎亭外水茫茫人家日暖樵漁樂山  
路秋晴松柏香隔水飛來鴻陣濶趁潮歸去櫓聲忙蓬萊

方丈知何處煙浪參差在夕陽

屋東

蒼鳩呼雨屋東啼麥穗初長燕子飛竹裏人家鷄犬靜水  
邊官舍吏民稀溪聲夜漲寒通枕山色朝晴翠染衣賴有  
西隣好詩句賡酬終日自忘飢

題齋壁

松庭日午聽啼鶯簾外人稀睡老鈴已歎近秋添白髮更  
因多病讀黃庭江魚未上烹難致江魚未上則不漁吳酒  
空斟醉易醒好住安心莫惆悵此身天地一浮萍

已卯十二月二十日感事

蹉跎流落已華顛又見荆湖一歲遷人怯苦寒愁日短天  
收殘臘放新年園林寂歷飄梅後里巷經過爆竹前自料

知非猶得在潛心久學衛蘧先

未將之臨淮旅泊泗上屬病作迎候上官不敢求告

北歸尤劇疎拙無以自振但自憫歎耳

謀身不解免飄蓬零落孤舟西復東雙鬢雖青應早白病  
顏更醉不成紅崎嶇避俗人難合憔悴多愁疾易攻蓴菜  
碧鱸秋正美步兵終欲向江東

望龜山二首

淮上風高寒日西龜山嶺下山雲歸游人苦恨日已晚青  
山自與雲為期輕舟漁子犯煙去照水白鷗窺影飛人間  
不作逍遙客老又塵埃空滿衣

日落看山山更青原頭啼鳥已春聲可憐山近不能到盡  
日與山相對行雲裏人家自來往天邊樓閣遠分明白鷗

不解游客意驚起碧煙深處橫

次韻答存之

環堵蕭然汝水隈孤懷炯炯向誰開青春不覺書邊過白髮無端鏡上來  
祭竈請鄰聊復爾賣刀買犢豈難哉故人休說封侯事歸釣江天有舊臺

離天長寄周重實

相逢握手便忘形射策天門盡弟兄浮世有誰尊道義青衫自笑爲功名  
高談未盡胸中意作別猶如夢後驚半夜扣門投野寺天寒孤月更分明

題堂下桐

零落當軒兩樹桐秋來相伴一衰翁寒枝向月空餘影墮葉知時不待風  
故國山川天黯淡美人音信雁西東歲華

節物俱寥落滿眼牢愁賴酒攻

登海州城樓

城外滄溟日夜流城南山直對城樓溪田雨足禾先熟海樹風高葉易秋  
疎傳里閭詢故老秦皇車甲想東游客心不待傷千里檻外風煙盡是愁

秋日憶家

汨汨流光長遠客年年秋至是離家孤城入夜寒更迥霜月滿天歸夢賒  
撼撼老桐風後葉娟娟疎菊雨殘花茅簷布被猶無力長走塵埃真可嗟

七言

飛鴻歸盡鷺將還亭院深沉人倚欄斜搭鞦韆寒食雨已黃楊柳暮春寒  
密裝杏萼紅如糝半落梅花香未殘人世

年年非舊事感時唯有淚洸瀾

京師廢宅

當道朱門白晝扃高堂歌吹久無聲古窗積雨昏殘晝朽  
樹經陰長寄生門下老人時洒掃舊時來客歎平生艷姬  
驕馬知何處獨有庭花香自榮

登城樓

沙雨初乾巾褐輕獨披衰蔓步高城天晴海上峰巒出野  
暗人家燈火明歸鳥各尋芳樹去夕陽微照遠村耕登樓  
已恨荊州遠况復安仁白髮生

送泗州推官王永年致仕還鄉王年四十而致仕士

大夫所少也

爲憶田園便拂衣休官退勇似君稀塵埃擺脫青衫去闕  
里驚嗟白髮歸南畝稻粱仍歲熟舊山芝朮入秋肥百年  
從此皆閑日寄語人間浪是非

和卽事

溪如圓塹木如城魚鳥從遊信此情啁雀踏枝飛尚裊仰  
荷承雨側還傾彈琴廢久重尋譜種藥多求旋記名于世  
久判無妙策直應歸學老農耕

自海至楚途次寄馬全玉

迂疎懷抱獨君知杖拂親依卽我師一句未能參妙道數  
篇空復得新詩子方奮迅雲間翮我厭追隨世上兒安得  
巖壑兩如志銅餅烏几爲君攜

蕭蕭柳岸野風秋虹挂前山晚雨收回首孤城空綠樹滿  
川斜日放歸舟年來雙淚供愁盡老去勞生幾日休試問

故人思我否夢魂猶在海邊州

高城欲去更徘徊病眼登臨強一開風物盡爲愁裏景山  
川疑是夢中來此生雙鬢何勞白未老塵心可得灰欲把  
煩愁付盃酒祇應清夢待尊罍

生涯飄泊一航輕浩蕩晴川送我行北望山川連海壯南  
來風月近淮清人家稻熟豐年滿澤國天高秋意生唯有  
鬢愁消不得登臨清淚落如傾

蕭蕭晚雨向風斜村遠荒涼三四家野色連雲迷稼穡秋  
聲催曉起蒹葭愁如夜月長隨客身似飛鴻不記家極目  
相望何處是海天無際落殘霞

夏日三首

長夏村墟風日清簷牙燕雀已生成蝶衣曬粉花枝午蛛

網添絲屋角晴落落疎簾邀月影嘈嘈虛枕納溪聲久判  
兩鬢如霜雪直欲樵漁過此生

黃簾翠幕斷飛蠅午影當軒睡未興枕穩海魚鐫紫石扇  
涼山雪畫青繒廊陰日轉彫欄樹坐冷風生玉盃冰滿案  
詩書塵蠹甚故應疎懶過炎蒸

棗徑瓜畦經雨涼白衫烏帽野人裝幽花避日房房歛翠  
樹含風葉葉涼養拙久判<sub>平</sub>藏姓字置身安事巧文章漢  
庭卿相皆豪傑不遇何妨白髮郎

和晁應之大暑書事一首

蓬門久閉謝來車畏暑尤便小閣虛青引嫩苔留鳥篆綠  
垂殘葉帶蟲書寒泉出井功何有白羽邀涼計已疎忍待  
西風一蕭颯碧鱸東鱸意何如

遣興次韻和晁應之四首

老去詩書倦討論一尊相對尚慇懃  
銀鑪放蕩狂中散書閣蕭條老子雲  
要路交親嗟隔濶他鄉耆舊飽知聞  
衰遲多病頭風甚解寄斯文獨有君

西風浙浙滿征衣天畔危亭面翠微  
雲解映山常漠漠葉知辭樹亦依依  
苦飢黃鵠猶謀食無事輕鷗得遠飛  
落日秋風滿江漢杖藜三嘆未能歸

夜泛孤舟清洛津宓妃輕步若為親  
清涵星漢光垂地冷覺魚龍氣近人  
鏡裏悲秋雙鬢髮馬邊隨客兩京塵  
愁心欲比東流水衮衮無窮日日新

蓬門鳥雀啁黃昏歸選牛羊各有羣  
水澗蛟龍陰後出山空虎豹夜深聞  
西來谷引秦川雨南去秋連楚澤雲  
唐漢

廢興無處問西風禾黍但丘墳

自巴河至蘄陽口道中得二詩示仲達與秬同賦

落月娟娟墮半環嘔鴟鳴櫂轉荒灣  
東南地缺天連水春夏風高浪卷山  
旅食每愁村市散近秋已覺暑衣單  
自慙老病心兒女三日離家已念還

浩浩渾流卷白沙中流鼓楫四無涯  
喜逢山色開眉黛愁對江雲起袍車  
雨足川原豐稻菽日斜鷗鷺滿蒹葭  
長年怕作扁舟客賴有高談一笑譁

離富池望廬岳是日入夾口直達潯陽遂舍大江之險示同行

山秀江清三百里與君三宿一扁舟  
飲殘桑落溪雲暮卧冷桃笙楚雨秋  
舟隱長江逢夾口眼明五老立雲頭  
幾年



澤國行將過歸與親朋說舊遊

山行二十三日即事

已逢斌媚散花峽不怕艱危道士磯啼鳥似逢人勸酒好  
山如爲我開眉風標公子鷺得意跋扈將軍風斂威到舍  
將何作歸遺江山收得一囊詩

渡洛因泛舟東下數里頗意淮上

云云清洛轉山隈渺渺東流不復回輕鳥竟隨青嶂去亂  
波爭泛夕陽來偶驚舟楫鄉心起乍脫塵埃病眼開疑是  
盱眙郭門外月明帆席過清淮

縣齋

只合門如野叟家市朝聲利苦誼譚但知得醉頻酤酒何  
處逢春不見花暗樹五更雞報曉晚庭三疊鼓催衙知君

宰邑端無事吟笑何妨到暮鴉

和周廉彥

天光不動晚雲垂芳草初長襯馬蹄新月已生飛鳥外落  
霞更在夕陽西花開有客時攜酒門冷無車出畏泥修禊  
洛濱期一醉天津春浪綠浮堤

春日遣興二首

流光向老惜芳菲搔首悲歌心事違綠野染成延晝永亂  
紅吹盡放春歸荆榛廢苑人閑牧風雨空城鳥夜飛斷送  
一翻桃李盡可憐桑柘有光輝

日烘烟柳軟於絲桃李成塵綠滿枝芳草有情隨處好落  
花無賴信風吹關心傷感知何處過眼芳菲能幾時一病  
春來妨痛飲遣愁唯有強裁詩

遺興次韻和晁應之二首

日落村墟煙靄青草根促織晚先鳴羣山袞袞望中去新月娟娟愁裏生暗峽風雲秋慘淡高城河漢夜分明寄書故國還羞澁白首蕭條老病嬰

露下風悲螢火流周南羈客意悠悠山川老去三年淚關塞秋來萬里愁慣逐魚禽語異俗每因霜月夢滄洲一拋硯井雙蓬鬢天畔詩成獨倚樓

儼居小室之西有隙地不滿十步新歲後稍暖每開戶春色闌進戲名其戶曰嬉春因爲此詩

蒼蒼老櫓已消雪冉冉烟蕪欲鬪妍圍得青春數畝地斷將平楚一方天春風入戶如相覓新月低窗最可憐老子婆娑便終日一壺春酒與周旋

發安化回望黃州山

流落江湖四見春天恩復與兩朱輪幾年魚鳥真相得從此江山是故人碧落已瞻新日月故園好在舊交親此生可免嘲僮父莫避北風京洛塵

離光山驛

郵亭結束問殘更斜月西南雞未鳴草草勞人常少睡綿綿遠道苦無情田家稔熟人情好野路雨餘秋氣清老得一州藏拙去鷓鴣臺閣盡豪英

卧病月餘呈子由

風葉鳴窗已復朝喚回歸夢故山遙酒壺暗淡浮塵集藥鼎青燼敗葉燒閉戶獨依寒蟋蟀移牀更就雨芭蕉雪深欲請安心術長日如年未易消

謁太昊祠

千里垂精帝道尊，神祠近止國西門。  
風搖廣殿松杉老，雨入脩廊羽衛昏。  
日落狐狸號草莽，年豐父老薦雞豚。  
舊遊零落今誰在，塵壁蒼茫字半存。

上元思京輦舊遊

九門燈火夜交光，羅綺風來撲面香。  
信馬恣穿深柳巷，隨身偷看隔簾粧。  
身拘薄宦安知樂，心逐流年暗減狂。  
留滯山城莫嗟嘆，貂蟬從古屬金張。

春晚有感

洛川三月鴨鵝鳴，游絮縈空塵不驚。  
茸茸草色鋪風軟，點點楊花著水輕。  
何處浮雲度天末，不妨微雨破春晴。  
江南有客增歸思，悵望汀洲蘋芷生。

次韻張公遠二首

襄王坐上徵詞客，子建車前步水妃。  
瞥過低鬟流盼處，爭先含笑獨來時。  
東邊日下終無雨，闕上書時合有碑。  
腸斷吳王煙水國，扁舟何日逐鴟夷。

平淡春雲捧額浮，秋光劍戟近人流。  
無腸可斷方爲恨，有藥能治不是愁。  
可待挑琴知有術，未傳驅豆更無謀。  
遙知添得春窗夢，尤在尊前燭下羞。

泊舟都梁亭二首

旅枕無眠客夢勞，五更傷舍一鷄號。  
淮天水濶浮梁小城郭，霜晴寶塔高梅鎖。  
冷香通雀啄水翻新綠，出漁篙君恩許作還鄉客。  
官對江離賦廣騷。

徵春已動陳根綠，晴日初流大澤新。  
客路苦寒唯飲酒，老

年便暖屢添衣霜林背日梅遲拆水渚知春雁早飛江上  
三年陳迹在年年穿竹摘梅時

都梁雪天晚望

浮梁淮面欲龍騰金碧浮屠間玉層古岸蕭條風卷雪長  
河咽絕水浮冰留連淮汴殘年客蹭蹬塵埃一老僧聞道  
都梁梅未拆可隨桃李畏嚴凝

舟中書事

久客益知行路難鏡中雙鬢不須看山川積雪堅冰地舟  
楫長淮古汜間餽費主人勤俗禮書來故里勸加餐北歸  
漸踏塵埃道盡日危亭且看山

讀黃魯直詩

江南宿草一荒丘試讀遺編涕不收不踐前人舊行迹獨

驚斯世擅風流一尊華髮江邊客萬里黃茅嶺外州虎豹  
磨牙九關窅重華可訴且南遊

辛巳歲魯直見余黃州江上

離山陽入都寄徐仲車

孤城芳樹碧層層村落黃昏只見燈回首事如前夕夢出  
門心似下山僧仕求行道時難偶意欲謀閑力不能寄語  
東華多釀酒待余歸日解行滕

題淮陰孫簿壁

荒涼官舍對淮流樽酒相逢爲少留夾道老椿鴉哺子隔  
牆芳草牧呼牛渡頭人散前村市天際帆來何處舟自古  
詩人最多感新篇應解寫騷愁

宿泗州戒壇院

樓上鳴鐘門夜扃風簷送雨入疎櫺老僧坐睡依深壁童

子持經守暗燈千里塵埃長旅泊五年憂患困侵陵誰知  
避世天然子一見禪翁便伏膺天然丹霞也

宿柳子觀音寺

黃塵滿道客衣穿古寺荒涼暫息肩倦體卧來便穩榻汗  
顏濯去快寒泉野僧治飯挑蔬至童子攜茶對客煎夜久  
月高風鐸響木魚呼覺五更眠

已未早春有感

南國柳黃鶯未知人情何事恨春遲雪抽宿麥晴來葉雨  
長枯榆燒後枝載酒有誰尋寂寞受薪只合學支離近知  
壁觀安心法亦擬平治不作詩

同袁思正諸公登楚州東園樓

杖藜蕭颯對雲沙白首逢春只歎嗟身老易傷千里目眼

驚還見一年花地平曠野連雲直天帶清淮向海斜尚有  
風光俱醉筆我生詩酒是生涯

同周楚望飲花園

杖藜攜手踏青苔蕭洒池亭爲客開柳色漸經秋雨暗荷  
香時與好風來斜陽似欲粧詩句新月邀將入酒杯身世  
已甘長寂寞忘形賴有子徘徊

赴官壽安泛汴

西來秋興日蕭條昨夜新霜緝緼袍開遍菊花殘藥盡落  
餘寒水舊痕高蕭蕭官樹皆黃葉處處村旗有濁醪老補  
一官西入洛幸聞山水頗風騷

壽蔡彥規兼謝惠酥梨

洛川北岸錦屏西竹樹蕭蕭面翠微風月有情常似舊山

川信美不如歸文章送老甘無用魚鳥從游久息機寄語  
長安倦遊客年來何事素書稀

三鄉懷古

清洛東流去不還漢唐遺事有無間廟荒古木連空谷宮  
廢春蕪入亂山光武祠南陌絮飛人寂寂空城花落鳥關  
關登臨幾度游人老又對東風鬢欲斑

水軒書事招壽安僚友

官閑不覺簿書勞一簟清風午枕高靜拂小屏圖女兒就  
書新竹記離騷城空鬪雉孤飛健柳暗雛鸞學語嬌東縣  
官曹誰過我欲酤村酒具山庖

官舍歲暮感懷書事三首

衙鼓寥寥送夕陽經時無客上高堂淵明柳老秋多雨子

敬龜寒夜有霜山樹葉稀晴摘果齋爐灰暖曉焚香經綸  
自有英雄在閑散須教屬漫郎

脩竹高槐交映門公居蕭洒近山雲醉眠多似陶彭澤官  
况貧於鄭廣文秋菊擣塵俱曉餌寒松收子和香焚經年  
門巷無車馬只有清風伴此君

霜菊始始尚有花蕭條廳樹暮啼鴉萬竿脩竹開侯府十  
里青山隱相家麋鹿並游諳野性詩書相對是生涯冷官  
自有貧中樂敢向朱門肉食誇

春陰

漠漠重雲向晚低臘寒新去有餘威風捎簷滴難開幌潤  
引爐香易着衣把酒自傾金錯落探春誰汗錦障泥山城  
冷落無歌舞只有芳醪取次攜

至日有感

一卧孤村雨見冬，獨搔華髮思無窮。  
荒山極目漫汗雪，老樹當庭晝夜風。  
佳節妻兒具樽酒，茅齋斟酌慰愁翁。  
未央曉賀瞻天冕，正在爐煙縹緲中。

歲暮福昌懷古

少年詞筆動時人，末俗文章久失真。  
獨愛詩篇超物象，祇應山水與精神。  
清溪水拱荒涼宅，幽谷花開寂寞春。  
天上玉樓終恍惚，人間遺事已埃塵。

李賀宅

永城道中

東行十日何所有，衰草白茅梁宋陂。  
天風官樹吹半折，欲雨野雲垂不飛。  
十年所遇半陳迹，千里獨愁懷所思。  
他日江湖片帆去，白頭青鏡久相期。

送曹子方赴福建運判

平生鄴下曹公子，家世風流合有文。  
橫槩尚傳瞞相國，紫髯不是畫將軍。  
詔書寬大民何怨，刺史威嚴吏合勤。  
好作楚詞更下俚，雲中一降武夷君。

和無咎二首

年芳經雨能幾許，客愁得暖不肖融。  
眼看乳鵲行已哺，手種小桃隨分紅。  
世情付睡莫涇渭，物態逢春無異同。  
清時賴是未禁酒，須惜紅紫轉頭空。

愛酒苦無阿堵物，尋春那有主人家。  
未容黃蜂釀成蜜，已怕惡雨不容花。  
雲間明月誰可攬，海中蟠桃良未涯。  
浮名誤人不得脫，黑髮減來那復加。

雙槐晚秀三月一日初見新葉

東皇無處著繁華亦復分張到我家他日老蒼悲敗枿今  
晨嫩綠出新芽禿翁承弁纖纖髮村婦縈鬟草草花桃李  
蹊中人迹絕綠陰門巷正藏鴉

秋思

故帷陳迹生蛛網古殿苔深疊綠繒簷雨晚秋鳴槁葉窗  
風淡夜觸孤燈

送李十之陝府

斷蓬泛梗偶相依一別重逢又幾時人世悲歡消遣盡爲  
君流淚忽沾衣

余向集賢殿試罷寓居京師常游西岡錢昌武郎中  
之第時同會者河東柳子文與錢氏三子夏中余  
出京今纔半年而昔日所游者或東或西有不知

所如者古人所謂俯仰之間已爲陳迹者歟夫求  
昨日之我於今日終其身而不得而况偶然相值  
聚而旋散者歟追記春睡詩一首乃寓錢第所爲  
者

東風冷峭着衣寒雲影陰沉美睡天青杏園林花落盡晚  
風吹雨濕鞦韆

上元都下二絕

淡薄晴雲放月華晚粧新暈臉邊霞管絃樓上爭酤酒巧  
笑車頭旋買花  
驕馬金鞭白面郎雙鬟小女坐車箱輪聲轆轤歸何處留  
得紅籠絳臘香

別錢筠甫三絕句



倦客無眠聽曉鐘五更蠟燭銷紅城西古寺同來處今日分攜獨向東

春燈欲盡曉鷄啼殘月影中征馬嘶爲語相逢不須喜相逢終有道分離

原頭綠盡柳初芟落月滿川風滿山已過寺西三十里爲君回首駐征銜

田家二絕

門外清流繫野船白楊紅槿短籬邊旱蝗千里秋田淨野秫蕭蕭八月天

新插茅簷紅槿籬秋深黃葉已飛飛灘頭水濶孤舟去渡口風寒白鷺啼

舟行六絕句

獵獵西風秋水清野花寒草出流生沙邊水鶴待魚立石底暗蛩先夜鳴

船尾初回轉野灣波平天淨皓投竿飛飛小蝶秋花晚噴噴沙禽野水閑

落景秋雲晚不開天寒古岸野船回初驚波面微瀾起已覺風前細雨來

渡頭風雨晚生寒蓑笠漁翁坐釣船爲問蓬中有魚否一雙新鱖出籠鮮

天寒野店斷人行晚繫孤舟浪未平半夜西風驚客夢臥聽寒雨到天明

渡頭煙雨欲昏天灣畔枯桑繫客船風打篷窗秋浪急一杯寒酒夜深眠

題壽陽樓二絕

渺渺長淮去不休行人獨上壽陽樓一闕長歌不須唱山

關事說於子友隴西子

川都是舊時愁長淮不斷水悠悠樓下行人淮上樓誰謂滿前風景好古今俱作別離愁

太湖上絕句

風蕩雲容不成雪柳偷春色於衝寒湖邊艇子衝烟去天畔青山隔雨看

誰道原頭春未回柳梢黃軟凍齊開爭驚臘日崢嶸盡急問田翁乞野梅

自上元後閑作五首

閨闔樓南粉署西舊時種柳長應齊如今冷落窮山縣卧

聽春風百鳥啼

東風吹雨夜侵堦樓角長煙曉未開何事舊時愁意緒一翻春至一翻來

面冷春霜拂瓦乾曉風吹雨凍闌干柳梢黃弱梅苞破更放東君幾日寒

燈火人家夜不收三更明月過南樓風煙隨處自能樂何事客心還獨愁

喧喧野縣自笙歌風捲高雲天似波誰謂樓前明月好月明多處客愁多

寫情

牆外誰家桃李開何由花下一徘徊先教飛絮傳愁去却遣遊絲取藥來

春詞

霽靄芳園誰氏家  
朱門橫鎖夕陽斜  
鳩鳴鵲噪閑庭館  
盡日春風吹百花

看花

風暖日高花氣動  
鳴鳩乳燕自家羣  
經營美景還詩匠  
傾掃頑愁賴酒軍

晚歸

學省歸來門巷秋  
伴眠書史滿牀頭  
低雲漠漠梧桐晚  
屏上江山亦解愁

傷春

浮雲冉冉送春華  
怯見輕寒日欲斜  
一夜雨聲能幾許  
曉來落盡一城花

元忠學士八兄未離京師遠蒙追送許惠服丹法託

故竟未惠及賦四絕句

身逐孤舟似斷雲  
故人追送尚慇懃  
秋城夜泊西風岸  
落葉悲蟲獨自聞

哀柝苦催空壁月  
悲蟲真弔短檠光  
無情少壯拋人去  
只有窮愁氣味長

昔見將軍破虎韜  
事見歐集玉堂曾共掃千言  
功名老去皆蹉跌  
相見諄諄勸學仙

無復顛狂似少時  
逢君猶自說娥眉  
玉堂舊事君休念  
兩袖啼痕又送誰

寓楚題楊補之官舍

一辭螭陛走天涯  
客路悠悠老歲華  
住久不知身是客  
自

來堂下採黃花

傷春

嫩紫妖紅惜不得，亂隨風雨點蓬蒿。  
荒田野草花開晚，主管春光輸爾曹。

七月十六日題南禪院壁

秋林落葉已斑斑，秋日當庭尚掩關。  
掃榻晝眠聽鳥語，可憐身世此時閒。

絕句二首

照水輕明楊柳牙，隔林相映占巢鴉。  
東風香草城邊路，到處人家盡是花。

淮上春風鶯鼓聲，落帆舟泊岸邊磯。  
喧喧野市殘陽裏，酹酒攜魚客散歸。

雨後遊朱園

綠葉陰陰護翠枝，晚花雖小亦應稀。  
東風不惜殘桃李，吹作春愁處處飛。

雜詩

病腹難禁七椀茶，小窗睡起日西斜。  
貧無隙地栽桃李，日日門前自買花。

春雨中偶成二首

廉纖小雨作春愁，吹濕長雲漫不收。  
架上餘醪渾着葉，眼明新見小花頭。

春陰只與睡相宜，卧聽鳴禽語復飛。  
一縷斷香浮不散，何人溪院畫薰衣。

牆東

牆東椿老葉已盡堂下菊叢無復香  
長安風埃歲已晚閉門不出馬毛長

項城道中

塵壁蒼茫有舊題十年重見一傷悲  
野僧欲與論前事自說年多不復知

懷金陵二首

壁月瓊枝不復論秦淮半已掠荒村  
青溪天水相澄映便是臨春閣上魂

曾作金陵爛漫遊北歸塵土變衣裳  
菱荷聲裏孤舟雨卧入江南第一州

柳

永豐坊裏舊腰支曾見青青初種時  
看盡道邊離別恨爭教風絮不狂飛

教風絮不狂飛

晚春初夏絕句二首

少室山前日日風望嵩樓下水溶溶  
卷將春色歸何處盡在車前榆莢中

睡足高簷春日斜碾聲初破小龍茶  
樓邊綠樹飛紅盡春色牆陰老薺花

謾呈無咎

題扇燈前亦偶然那知別後遠如天  
去年醉舞看花處獨聽琵琶却惘然

泊楚州鎖外二首

襄王席上舊行雲二十年間生死分  
可惜風流一杯土年年春草斷人魂

流落相逢二十年，羞將白髮對嬋娟。如何見我都依舊，添得尊前一惘然。

慈湖中流遇大風，舟危甚食時。風止遊靈巖寺。

心悸西江浪似山，眼明僧舍一窗閒。從今要見廬山面，畫作屏風靜處看。

觀魚亭呈陳公度

獵獵微風波面開，近人鷗鷺不相猜。尊前忽起扁舟興，新管江南山水來。

紹聖甲戌侍立集英殿臨軒試舉人作此兩絕

春來小殿雪初殘，曉日曛曛未破寒。黃繖當軒公事退，君王緩步侍臣閒。

弱歲千名翰墨場，春寒搖筆試西廂。茫然二十年間事，還

着春衣侍玉皇。

題周文翰郭熙山水

洞庭葉落萬波秋，說與南人亦自愁。指點吳江何處是，一行鴻鴈海山頭。

夜聞風雨有感

畱滯招提未是歸，卧聞秋雨響疎籬。何當粗息飄萍恨，却誦僧窗聽雨詩。

偶題二首

相逢記得畫橋頭，花似精神柳似柔。莫謂無情卽無語，春風傳意水傳愁。

春水長流鳥自飛，偶然相值不相知。請君試採中塘藕，苦道心空却有絲。

青桐道中值雨凡數里舟行久之頗有江湖之思二首

繫馬操舟問櫂師却疑淮口挂帆時人間遷改何須問便作江湖未可知

冥冥煙外鳥飛歸野老得魚收網廻隔浦斷霞沉欲盡半彎新月出雲來

福昌官舍後絕句四首

淮南梅柳想春還怯去西州歲暮寒唯有看山心未厭晴  
明終日在欄干

無客門闌盡日扃兩行喬木擁寒廳吏胥借問官舍在流水聲中看竹行

卧聽堂南布穀鳴隴頭細麥已青青慙慙謝汝催春種我

爲無田豈懶耕

不掃竹根藏筍苗旋培殘雪擁蘭芽爲君更接櫻桃樹付與春風換却花

無題二首

風魂已疎遽如許夜蛩雖怨可若何出門蹄道苔痕滿隱几書塵鼠蹟多

晚起清秋一枕涼四簷鳴雨下淋浪竹籠焙藥時添火書榻焚香却閉房

雲溪道至四安鎮

茗雲清秋水底天夜帆燈火客高眠江東可但鱸魚美一看溪山直萬錢

聞蛩二絕

晚風庭竹已秋聲初聽空階蛩夜鳴流落天涯聊自得今宵為爾感平生

二年江海轉萍蓬白髮蒼顏換舊容新月窺簷風動竹宣城今夜又聞蛩

雨中題壁

去年此日泊瓜洲衰柳蕭蕭繫客舟白髮天涯嘆流落今年對雨古宣州

預作冬至

紫壇曾從奠琳琅親被天人玉冕光今日黃州山下寺五更聞鴈滿林霜未元祐七年南郊曾與捧策在皇帝禮席左見上冕玉簪自如雪為燭所照出光數尺

聽鳴禽

流滯江邊鬢已霜又聞春鳥啭朝陽他時北去懷陳迹寒竹疎梅黃土岡

曉雨

輕陰江上千峰秀小雨墻邊百草生惟有春禽慰孤客曉帶渾似故園聲

春蔬

新春書劒滯江城又見南蔬入旅羹關心太昊祠前路小甲連畦帶雪青余有蔬圃在陳州太昊祠南

春日懷淮陽六絕

西城門外古壕清太昊祠前春草生早晚粗酬身計了長為閑客此間行

靈通禪刹古叢林永日惟聞鐘梵音闍世興亡千室佛百



年風雨古牆金

靈通院石晉末所創有千佛殿壁繪用金

最愛南城汲井園春來蔬甲不勝繁人家斷處無鷄犬遲

日東風似古原

黃巢寨南琵琶溝古原芳草靜春流大船舸舫何處客檣

竿西北是神州

莽莽郊原帶古丘漸漸隴麥散羊牛杏花楊柳春濃處一

片青帘慰客愁

城中萬枝木芍藥姚黃一萼得春多日日踏春渾坐此人

間無醉奈渠何

上元三絕句

清晨謁帝大明宮拜賜歸來夜過中

余在秘書近十年每歲上元晨趨大慶迎

駕近午駕回駐輦大慶門上賜茶酒拜謝退率一夢十年

身老矣山城風月作過從

酤酒壚邊人若市算商亭下浪連天張君官况今如此豈

有工夫作醉眠

江邊燈火似秋螢哀怨山歌不可聽自怪今春牢落甚禪

房止酒讀黃庭

春日書事

蟲飛絲墮兩悠颺人意遲遲日共長春草滿庭門寂寂數

櫺窗日挂空堂

柯山雜詩二絕句

幽人睡足岸綸巾策杖開門卯酒醺黃葉滿山烏鵲噪江

城秋日少人行

蕭蕭茆屋土山前翁媪關門去獲田朝日滿簷鷄犬靜荻

籬溪處有炊煙

絕句九首

天高列岫出林外  
霜落大江流地中  
晚日橋邊數歸牧  
牛羊部分聽兒童

樹頭三唱雞  
賓日門外斜行雁  
寄書十月江城霜  
霰薄滿山林葉亂藍朱

曉起山鴉噪作團  
西園霜木倚空寒  
風高斷雁呼前伴  
雨止歸雲赴舊山

千林黃葉摠飛霜  
寂歷疎梅未肯粧  
誰信輪囷卧山木  
心知九地有微陽

空山風雨冷蓬茅  
晨起幽人理緼袍  
溪閉衡門且無出  
濕雲如墨怒江號

老去不禁茶力悍  
兩甌破盡五眠月  
團三百真魔物欲  
乞當壚當酒錢

讀書老眼苦眠昏  
茗飲無端遣夢魂  
到處相逢真可喜  
祇應酒是好知聞

黃葉桑林赤土岡  
蓬茅小逕度牛羊  
似聞流冗之唐汝  
歎息何人為發倉

歲弊寒驕風落山  
卧聽園木怒濤翻  
去年慈德門東雪  
永夜宮廊喝探喧

齋中列酒數壺皆  
齊安村醪也今日  
亦強飲數杯戲  
成絕句奉呈兩老  
昆仲

曾嘗玉帝碧琳腴  
不醉長安市上酤  
飲濕先

作史官時歲節賜御醪

去年春大雪中予以禮官奉欽聖喪事入宿內東門凡數十鋪直廬官吏達旦不能寐

黃累年旱飢流民就食唐汝

生今已矣啜醪留得與門徒東坡三年黃州城乏酒但飲

臘月下旬偶作

歲暮煙霜澤國寒曉鴉鳴處是柯山地爐有火尊餘酒自起焚香淡掩關

二月二日挑菜節大雨不能出

久將菘芥芼南羹佳節泥淡人未行想見故園蔬甲好一畦春水輓轡聲北方治菜畦如茶拌土極細勻汲井灌之次第相及殊可觀也

寒食日作

荒山野水非吾土寒食清明似去年楊柳插門人競笑吳夷不信子推賢黃岡有官人效北方以麩作子推貫柳插門上者邦人怪之

東堂初寒創意作竹屏障門屏脚偶得朽梅株截用之完固質野有可喜者二首

丈室新幄用此君如用鄭子之用碧琅玕插古槎根白雲一片當

空下護此寒堂宴坐人

簡冊林中老蠹魚年來窮謫尚耽書竹幄風下憑烏几畫作柯山居士圖

地爐

歲陰慘澹不可出竹榻地爐聊自安黃葉滿山籬落晚北風吹雨濕荒寒

久雨

欹簷積雨苔生瓦陋巷人稀泥及門坡下牛羊來遠墅舍傍麻糝接荒村

秬移宛丘牡丹殖畦竇齋前作絕句示秬結和千里相逢如故人故栽庭下要相親明年一笑東風裏山

杏江桃不當春

余元祐六年六月罷著作佐郎除秘書丞是歲仲冬

復除著作郎兼史院檢討復至舊局題屏

庭樹應知我相逢益老蒼別來秋苦雨但見瓦松長

次集鈔

廿五

晁冲之字叔用初字用道舉進士與陵陽喻汝礪爲同  
門生少年豪華自放挾輕肥游帝京狎官妓李師師纏  
頭以千萬酒船歌板賓從雜選聲艷一時紹聖初黨禍  
起羣從多在黨中被謫遂遂飄然棲遁于具茨之下號  
具茨先生十餘年後重過京師憶舊游作無題詩二首  
爲時所傳時諸公謀欲用之高挹不顧至疾革取平生  
所著曰是不足以成吾名悉焚之故其詩不多呂紫微  
位之江西派中云衆人學山谷叔用獨專學杜詩衆求  
生西方時秀實獨求生覓率然又云叔用嘗戲謂我詩  
非不如子只子差熟耳答云熟便是精妙處叔用大笑  
此亦紫微多上人語耳若其淵淳雅亮筆有餘閒未宜

退下一格也劉後村稱其意度容闊氣力寬餘一洗詩人窮餓酸字之態南唐後推放翁可以繼之其見許如此足為雅鑒

古樂府

大星何歷歷小星爛如石掖垣崔嵬橫紫微十二羽林  
北極今夕何夕月欲沒虎抱空關龍厭直崢嶸北斗著地  
垂手去瓠瓜不盈尺嚴陵醉卧光武傍浮楂正值天孫織  
王良挾策飛上天傅說空騎箕尾立君不見茂陵棄子欲  
登仙白將壯士終南邊忽然遭窘出璽綬歸來下詔除民  
田阿瞞急示乘輿物鮮田仍棄珊瑚鞭又不見古來求  
戒華屋敵國挾輈戎接駟自龍魚服誤網羅孔雀金花  
牛觸

夷門行贈秦夷仲

君不見夷門客有侯嬴風  
敢捕倚天長劍著崆峒  
聽仰天一笑萬事空入門  
元宮嗚呼男兒名重大山  
好色馬相如慷慨直辭猶  
如葉手犯龍鱗心莫憚一生

陸元鈞 寄日注茶

我昔不知風雅頌草木獨  
真淇園竹同種又疑禹漏  
妄測聖人意遠物勞民亦  
來枉飛鞚羊羶異好亦何  
真禍首毀論徒勞世仍重

溪痛老夫病渴手自煎  
對悠悠亦從衆更煩小陸分日  
注密封細字蠻奴逐檢旗  
却憶採蘋初雪花似是雲溪  
更期遺我但敲門巫川無  
復周公夢

贈僧法一墨

黃山之巔百尺松虬枝偃  
盆連羣峰山神守護魍魎避道  
人剪伐天爲容捫崖蹉踣  
再火遠絕壁掩靄凝煙濃玄霜  
霏霏玉杵下捕麋煮角當  
啟冬陰房風日不可到律琯吹  
盡灰無蹤小書細字著名  
姓黃金照耀圖雙龍守臣再拜  
選進日九關有詔開重重  
老儒偶得實天幸千金更買無  
由逢上人澹泊何所好工書草隸如飛蓬苦來求我惜不  
得一酬十載相過從君不見玉堂詞人紫垣客拜賜舞  
黃羅封長安紙價猶未貴江南江北山皆童

法一以余所贈墨爲不佳

上人好事世莫當羅列四寶如文房廣交往往得奇物有  
墨尺度如圭長秋麋折角膠與力春麝入臍煤生香已將  
雪覆輕羅帕更令花映紅紗囊草堂老人不自料亦藏一  
餅誇精妙自言和璧持贈君反爲燕石遭譏請嗚呼萬事  
孰不然古今工拙那同調君不見當年諸李數不到廷寬  
只今賜墨無老潘

復以承晏墨贈之

我聞江南墨官有諸奚老超尚不如廷珪後來承晏復秀  
出喧然父子名相齊百年相傳文斷碎彷彿尚見蛟龍背  
電光屬天星斗昏雨痕倒海風雲晦却憶當年清暑殿黃  
門侍立才人見銀鈎洒落桃花牋牙床磨試紅絲研同時

書畫三萬軸大徐小篆徐熙竹御題四絕海內傳秘府毫  
芒惜如玉君不見建隆天子開國初曹公受詔行掃除王  
侯舊物人今得更寫西天貝葉書

東陽山人僻居

我家京洛間桂玉資薄產平生丘壑心水竹不滿眼清晨  
有客吳中來山川指授收奇才笑談長揖波浪下懷抱遠  
承一作崑允開東陽山人高華隱豪俠持身復修謹旁山  
多闢黍林田碧溪東流汲春醞溪南一畝當翠微秋風蓴  
熟菰葉肥龜魚上帶藻荇動鷗鷺下拂芙蓉飛亭陰野塘  
亦新築溪山共作窓中綠諸郎年少皆知書子夜哦詩勸  
修竹歲時冠蓋如浮雲擊鐘鼎食江淮聞愛山自比謝康  
樂好士不減春申君我欲沿溪揚小楫亭邊共醉藤蘿月

叩門夜訪君家時扁舟重載山陰雪

同魯山韓丞觀女靈廟前險石

君不見魯陽之西兩山麓十里連岡寫平陸青林白晝暗  
古祠雀啁虛簷蛛網屋屋邊怪石何瑰奇鳳筋虎骨連肌  
肉巉巖欲下落澗渚瀕洞千鈞一毫屬天匠惟知刻畫功  
鬼力淡憂護持哭前峰高蹇下如揖餘峰危慄皆俯伏披  
尋宿莽得佳趣窟爲溪壑呀爲谷香爐佛迹不在外仙掌  
蛾眉此其足秀潤潛涵夏木清空濛映帶春江綠我知此  
必蘊靈異何止懷藏易城玉間寂嗟來麋鹿游孤峻幸免  
牛羊觸自經千載禹刑鑿不逢萬里秦驅逐踟躕三遶回  
高岡却立下視雲蒼蒼古今誰爲好事者後有韓子前奇  
章君不見玉川先生洛陽宅脩竹蕭蕭獨爲客它年如與

鶴乘軒可來相見銅駝陌

題魯山溫泉

平生耳熟聞驪山夢寐不到臨潼關當年太液金井碧溫泉  
泉宛在關山間憶昔君來必十月騎玉花驄帶風雪太真  
獨侍沐浴邊鯨甲龍鱗影清絕五十年昇平一迷却驅萬  
騎出關西自爲前朝同禍水翻令後代異廉溪君不見汝  
海之南魯山左亦有此泉名不播征夫問路說湯頭可憐  
是亦陳驚坐

香山示孔處厚

我來南經幾山過馬行似衝山色破風煙席卷崑穴開澗  
花縈迴水流左懸崖彷彿聞松聲下瞰幽溪鳥飛墮老夫  
它年有所歸定結白茅依紫羅日高下馬古寺門魚鼓欣

聞脫清餓道人碧眼照川谷雲起盤陀藉高坐殷勤勸我  
更莫歸喚鶴啼猿亦相和窓前笑喚神孔賓世間安用招  
魂些

簡江子之求茶

政和密雲不作團小夸寸許蒼龍蟠金花絳囊如截玉綠  
面彷彿松溪寒人問此品那可得三年聞有終未識老夫  
於此百不忙飽食但苦夏日長北窓無風睡不解齒頰苦  
澁思清涼故人新除協律郎交游多在白玉堂揀牙鬪夸  
背歛嘗幸爲傳聲李太府煩渠折簡買頭綱

田中行

落葉如流人遷徙不可收巖霜枯百草清此山下溝我行  
將涉之脫屣笑復休憮然顧籃輿崎嶇反經丘天風吹我



裳彼亦難久留晚過柳下門鳥聲上啾啾父老四五輩向  
我如有求邀我酌白酒酒酣語和柔指云此屋南頗有良  
田囑勸我耕其中庶結同社游吾母性慈儉此事誠易謀  
伯也久吏隱可以吾無憂請歸召家室賣衣買肥牛所望  
上帝喜祈穀常有秋

送王敦素

先君有六女所託皆高門季也久擇壻晚得與子婚子家  
望海內實惟謫仙孫筆也有家法勢作風雷毒結交多英  
豪坐致名譽喧憶昔識子初河流出崑崙中間一再見騏  
驎始伏轅去年接同居底裏見所存磊落忠義人愛國憂  
黎元使當元祐時密勿與討論上可參廊廟下可裨諫垣  
惜哉不遇知白髮早已繁卑官不可說感激猶主恩爛熳

有歸期繫舟古槐根祖餞無酒食贈遺請以言子家鐘山  
下隨事有田園竹徑背古寺草堂面江村高軒納翠微修  
筒引潺湲林影散疎帙山色搖酒罇日飲建康水時登謝  
公墩沈酣左氏學浩蕩極辭源客至勿多語欲吐且復吞  
書來無怒怒慰我別後魂

紀愁

北風吹我裳夏潦漂我屋牛羊踐我稼雀鼠耗我穀雪寒  
墮我指雨淫疾我腹朝行桑榆間秋序傷遠目莫涉水之  
涯含沙中兩足攬轡馬病黃伏軾輿脫輻陟山旣見虎還  
舍乃對鵬一沐三握髮十飯九不肉先生昔離垢居士今  
耐辱飽聞戒畏塗那知有沈陸

和四兄雪夜韻

夏蟲不知冰越犬不識雪我獨水雪間肘見冠纓絕青燈  
挂長檠文字夜涉獵問米米已無問酒酒已竭當時陶淵  
明同日無此闕置書忽不樂面塵卧嘔噎蟲犬兩不如悲  
歌聊一發

和十二兄五首

淵明詩百篇無一不說酒四顧宇宙間獨與此物厚子雲  
苦家貧日給或亡有艱難識奇字草玄至白首時時載酒  
來尚乃好事友吾兄斯人徒性亦嗜醇耐寧知俗士嫌益  
覺見女醜孰云醉無度婉婉一作婉春月柳區區布肉論遲  
速同一朽但看古聖賢得如飲者不  
伯也今代豪嗜詩如嗜酒賦多轉適勁語老愈淡厚塵言  
刪不存妙句元自有白華忽補亡關雎不爲首項篋起兄

弟珠玉到朋友吟詠九日菊沉酣八月耐搜剔發清新聯  
翩雜奇醜詳味吁謨章用意過楊柳但使身愈窮未信名  
可朽不知造物意令作清廟不

崎嶇謫仙人豪放一寓酒平生韓荆州未識意已厚幙府  
強辟召此例未見有書幣入吾廬鞍馬望隴首出處計已  
熟不復訊交友南山別何時氣尚若耐耐籌策屈大才談  
笑誅小醜戍角斷落梅羌笛起折柳將軍意未快戰士骨  
已朽請公入叅謀可用和我不

先生翰墨英揮灑每被酒氣凌蒼柱穹勢壓坤軸厚俊拔  
今固無妙絕古未有驚鸞忽矯翼犇馬時驤首高步褚薛  
流下視鍾王友好事隨取之所至具名耐簡疎秦隸奇譎  
怪夏篆醜么麼張芝草嫵媚元和柳載觀碑籍存尚恐金

石朽未知太極成有請於公不

我家溱洧間春水色如酒嵩少在吾旁日夕意亦厚田園  
雖不廣幽興隨事有藥畦灌陳根芋區採駢首春郊餉耕  
徒秋社接酒友飽誦傳家書促釀供客酌益知簡易真未  
媿疎拙醜邇來居東都物色不見柳造次遇雅折荏苒及  
衰朽欲歸便可爾未知公果不

次韻集津兄會羣從王敦素宿王立之園明日西征

馬上寄示諸人

以道嘗監陝府集津倉

秋高訪幽居風急桑未落天寒鷄犬靜地僻門巷濶主人  
避世賢自說久棲泊呼兒出罇罌梨栗亦不惡賓客四五  
人談笑動林薄夜闌慘無懽離憂倏中作伯也天下士千  
金輕一諾揮斥揚墨徒正是鄒魯學如何但銀魚生事了

無託惜哉桃李姿見笑葵與藿雞鳴驅車行令人意參錯

復至新鄉解寄張穉

驅車出吾廬落月猶在樹我行欲何之所以河源去去去  
益以遠炯炯不可論羣語車鐸間尚想兒女喧稍涉原上  
路漸見柳下村霧草結宿露風林散朝暎悠悠望蘧廬我  
僕欣載犇昔出日在畢今出畢中昏昔如水今如檻  
中猿所憂負平生豈但感寒暄明濟十里黃漪漪見淇園  
晚投伯氏廨拓落復何言周覽故時居恂見松菊存故侶  
未易招且自置肴尊

書懷寄李相如

秋風吹哇蔬農事亦已闌黃黃杞下菊佳色尸冢間我生  
復何如憔悴嘗照顏清晨戴星出薄暮及日還骯髒二十

載老髮羞儒冠天末有佳人秀擢如芝蘭  
慨然念夙昔風流得餘懽緬想蒲柳姿與君同歲寒  
一別事瓦裂令人氣如山

戲李相如攜婦還金鄉

舍人固多奇奉壁登章臺君王擊缶罷將軍負荆來長卿  
束髮時亦復悅名字一從臨邛游心迹了不似茂陵未得  
仕要是才足依高堂援哀琴月出載婦歸文君入成都乃  
復愧四壁晚見負弩來良悔抱頸泣

效古別昭德羣從

十載一相逢相見無浹旬一生能幾別且復無此身昔別  
尚可惜此別重惜之兩髀跨鞍馬非復少壯時它人怪康  
強自覺筋力衰所苦氣如縷所憂命如絲死生亦大矣而

乃常別離人生一月閒得笑無六七朝爲衆狙喜莫作枯  
魚泣已矣泉下入優哉冢中骨

雪效柳子厚

一作贈一兄上人

月落鷄聲寒曉色靜茅屋開門驚不知夜雪壓修竹槎牙  
生新冰鱗甲刻溪谷晶晶洲渚明冽冽川原肅孤蹲雀不  
動沉酣客猶宿呼童晨汲歸獨漱寒泉玉

擬一上人懷山之什

中夜雪打窓燈暗火照屋袖手地爐火鏘聲起絲竹憶我  
故山房松風韻崖谷山空牛斗寒寺靜魚鼓肅西寨鹿不  
歸東嶺鶴獨宿更想醉翁亭兩峰高並玉

傷心

時籍谿公宅

沙路未輻想馭軒傷心歲月似星奔平泉有墅空流水綠

野無人但繞垣九老畫圖傳盛事四朝書史載殊恩如何  
巧者持鋤過已向比隣問子孫

送惠純上人游閩

蚤聽閩人說土風此身嘗欲到閩中春溝一作水動茶花  
白夏谷雲生荔子紅襟帶九江一作樹山不斷梯航百粵  
一作波連越嶺海相通北窓夜展圖經看手自題書寄一作索筆  
題詩送遠公

次四兄以道韻效李義山雪

莫冬一丈長安雪壯士臨風獨慨慷門巷豈無騎馬客江  
湖猶有捕魚郎夜平蔡賊兵輕敵曉入梁園賦擅塲載酒  
欲尋誰與飲江梅頭白自悲傷

次二十一兄季此韻

憶在長安最少年酒酣到處一欣然獵回漢苑秋高夜飲  
罷秦臺雪作天不擬伊優陪殿下相隨于蒞過樓前如今  
白髮山城裏宴坐觀空習斷緣

和江子我竹夫人

黃藤白簟倦呼盧高卧南窓示楷模郭芍藥情元最密鄭  
櫻桃迹近相疎下帷度日甘同夢隱几終年得異書晚向  
禪房陪杖屨清秋霜霰意何如

答韓君表

百年鄂杜家相近人物凋零我獨驚但見少陵能繼祖不  
聞小陸可優兄終朝詩賦道仍鬱老去文章健更成敢擬  
濟河輕一戰隱然望已一作望怯長城

和葉甥少蘊內翰重開西湖見寄二首

使君重繫西湖罷也復封詩寄我來洲上新題花鳥處苑  
中舊體栢梁臺風煙直覺鍾山近魚鳥渾疑澗水開揮翰  
玉堂還有日行春停騎且留杯

一麾偃蹇江湖去五馬侵尋觀闕來就日金波通漢苑望  
雲玉澗斷蘇臺自迎檝立看時渡近開買手種花行到處開  
笑語風流韓別駕莫令鸚鵡訴餘杯

和寄葉甥少蘊內翰見招

翰林赫奕今如此莫道人惟舊雨來龐老終身遠州府劉  
郎何面向春臺八兄常言少蘊亦欲見招園宜杏子非時結溪澗梅花  
過日開兩地聲聞無百里相望一覆手中杯

次韻再答少蘊知府甥和四兄以道長句并見寄

錦袍昔是詩成得別墅今非棋賭來山蔚藍光交抱舍水

桃花色合圍臺通人竹塢深深入謝客松扉遠遠開定興  
西湖爭勝負只應惟欠使君杯

塵埃自與青雲斷歲月誰令白髮米數口無歸關外客一  
春多病望中臺常閑水上鷗從遠只老籠中鶴任開日日  
避愁無處脫直須到手不停杯

復和少蘊內翰甥兼謝伯蘊起判兄再贈

西湖波浪還佳色風物悲人老可為游接竹林公對叔夢  
迷春色我思兄酒沾鸚鵡杯行盡與伯蘊兄詩常詩傳  
蟾蜍研立成壯思不逢韓吏部高名誰伴謝宣城

復用韻

史奏德星今復聚鄉評月旦昔何為穎川人望須公守荀  
氏家聲付此兄湖影龜魚同聚散寒陰燕雀半生成若為

修襖無絲竹古調新詩唱渭城少編新作亦舊花詩奇絕

次韻集津兄懷嵩少示王立之

早聞三十六峰前願寄茅茨一澗邊谷轉馬蹄山繚繞  
開虎口樹蟬娟陽坡日煖宜瓜地陰嶺天寒熟芋田便好  
與公相隱去不宜相對尚茫然

睡起

素屏紋簾徹輕紗睡起水盤自削瓜風筍微微開綠籜雨  
槐細細落黃花經營薄產初無意補葺疎籬漸有涯待得  
高秋尋靖老臨流坐石問丹砂

贈山人沈廣漢

禪房白几靜無塵野服黃冠意甚真避世全生後得策閉  
門謝客亦高人忍情斷酒非關病隨意收書不計貧近約

嵩陽陳叔易越移丹竈過殘春

都下追感往昔因成二首

少年使酒走京華縱步曾遊小小家看舞霓裳羽衣曲聽  
歌玉樹後庭花門侵楊柳垂珠箔窓對櫻桃卷碧紗坐客  
半驚隨逝水主人星散落天涯

春風踏月過章華青鳥雙邀阿母家繫馬柳低當戶葉迎  
人桃出隔牆花鬢深釵暖雲侵臉脣薄衫寒玉映紗莫作  
一生惆悵事鄰州不在海西涯

送僧歸建州

清秋穎汝歸時晚不及羣公送直休曲几數行題字別扁  
舟幾日為詩留東吳楊柳雲中渚南越梅花雪外洲萬里  
故鄉聊一到江山風物往來游

送王敦素

樸

龍蟠山色引衡廬霜落江清影  
虛鼓柁厭騎沙苑馬行  
厨欲食武昌魚緩歌玉樹翻新曲  
趣入金鑿續舊書官達  
故人稀會面君來相見官如初

再至徐州示諸弟

去年客徐得范子今年客徐不  
入斷無草木與同味宛  
有魚鳥來相親南尋白門傷山林  
西望黃樓行水濱還家  
作詩示羣從早晚一遊攜二陳

留別江子之

盡室飄零去上都試於溱洧卜  
居不從刺史求彭澤敢  
向君王乞鏡湖平日甚豪今潦到  
少年最樂晚崎嶇故人  
鼎貴甘相絕別後君須寄一書

別昭德弟愴然傷懷

吾廬去汝到何期四十年間此別離  
合抱樹元從舊種幾  
叢菊始自新移老無兄弟飄零日  
遠有公卿曠絕時努力  
不思勤負米欲求三徑可從誰

客有駕馬不肖借作詩誚之

兒少欲立奇功貴買西宛玉面驄  
金躡蹠微鳴躡影錦  
連乾不動追風庭槐洗立清陰下  
沙路調行返照中出郭  
借人乘豈官自誇騎入大明宮

別飾道二十弟

飄零南北一衰門知是澶淵五世孫  
嗟我獨無兄弟在襟  
君尚有典刑存老身素苦貧常瘦  
病目仍緣哭轉昏它日  
汝歸馳駟馬訪吾官過浣花村



自然詩并序

七里先生江子我築土三尺名曰自然亭余謂先生不獨有亭亦有自然箕斗自然絲菱凡亭之內服食器用無不自然者先生可謂自足者也雖然無乃多虛少實乎子我掀髯大笑余欣然賦之

先生手不廢經營白屋憑虛結此亭燕麥兔絲侵密坐南箕北斗挂疎櫺青松夾日交傾蓋翠栢分風倚列屏莫道君家無長物案頭燈火有流螢

敦素有以書局處之者作詩迎之

君王側席訪詞臣萬里江湖賀子真翰苑向來非此老道  
山河處得斯人朝回金馬門前曉宴罷銅駝陌上春底事  
年年最如意春風還試綠衣新

寄王立之

臘雨城南宅衝寒憶屢陪拊隣庭下石問訊竹間梅諸子  
磨門立羣公跋馬回不知多病後誰與倒樽罍

避暑普淨院

玉矯栢如龍清陰闕一宮庭無御史雨門有大王風今日  
名天下羣公坐此中阿戎相就語歷歷見元豐

僧舍小山

此老絕蕭洒久參曹洞禪曾中有丘壑左手取山川樹小  
風聲細巖深日影圓江湖不歸客相對一茫然  
愛此聚沙戲知自法王孫一運郢斤手都無禹鑿痕藤栢  
未挂壁荷葉欲生盆笑問山陰道潛通何處村  
爛石有佳色禪房疊更幽九疑峰不斷十字水長流枕簟

日逃暑軒窓時卧遊吾衰更何往只此對湯休

寄江子之

平生江季子疎嬾近忘吾不啻三年別如何一字無燒丹  
岫屢令釀酒步兵厨二者將安擇功名莫浪圖

初來東里

乘流從此去河漢失清都送騎沙邊散征帆雨外孤挾雌  
棲隴雉生子哺巢鳥宇宙將焉往飄飄盡畏途

至東里次前韻

茂陵家四壁不必在成都老矣招魂苦傷哉問影孤市中  
寧有虎屋上豈無鳥四海皆行路吾何必此途

和四兄

以道閒居感歎有作  
掩卷忽不樂捫心空浩歎家聲畏淪墜世態屬艱難

迎門疑風彈挂壁冠蕭然對孤竹一笑共衰殘

復次韻

出門吾所嬾無客亦何歎舉世遠如許孤風良獨難荒蕪  
蔣詡徑破敝晏嬰冠興發看山去書籤記讀殘

再至都城

崢嶸花萼西清曉望猶迷御路紅塵合宮槐碧瓦齊夾城  
知輦過複道覺香低中使傳宣入千門避馬蹄

送僧

無端伏枕日不見放舟時晚得平安報初成送別詩山深  
歸履急江濶度杯遲定許同香火終叅惠遠師

秋雨感事

苦雨荒秋宅寒生木葉悲半垂藤護壁中缺蔓穿籬書校

時開帙壺提日繫絲儒冠吾已悞何責五男兒

問訊次九日韻

問訊西南戍提封莫遠開休傳通蜀道端可棄輪臺擬上  
平戎策慙無屬國才何須千里馬遠自渥洼來

夏室

夏室不禦暑竹陰新未交幽花時結子晚燕續開巢午夢  
還高枕晨炊出近庖此生吾自了客至莫相嘲

次韻江子我見寄

敢恨新居僻深懷故國尊耕耘得遺物版築尚頽垣溪隔  
城南寺崖通市北門宅時如訪我但認語音存

過陳無已墓

以我懷公意知公待我情五年三過客九歲一門生近訪

遺文錄重經故里行寄書無鄭尹誰為葬彭城

行武涉田中

慣習兒童喜從容父老懼枯槁看俯仰稼穡愧艱難荷葉  
生池岸蒲萄落井幹求田如得此當為駐征鞍

重過鴻儀寺

秋色遽如許寒花祭若何客行傷老大野次記經過廢圃  
猶殘菊枯池但折荷吾生與物態天意豈蹉跎

別節道二十弟賁之

少傅三朝老文章壯九州賦詩資政殿賜字太清樓拔燭  
辭軒陞簪花近冕旒慶門吾老矣華國汝能不

別息道二十二弟兌之

中令有清德風流二百年舉家惟食粥絕口不言錢里開

容吾老庭闈賴汝賢陶丘過范蠡莫泛五湖船

和虞道二十三弟像之

向別已復久此懷誰與明書來慰吾意詩重識君情放鶴  
惜未到飛鴻今尚橫何由一隨汝端為薄浮名

決道念八弟得小金印以詩贈之夫之

季也獲金印籀文余不如情知非鬼篆恨不識天書池靜  
龜游罷庭閑鵲鬪除春風還舊物疎俊獨憐渠

贈江子我子之

江郎淮海秀經術口同師温潤無前輩清新有近詩一丘  
須早計五斗莫堅辭獻賦修竿牘知君定不為

謝富察見過

飯蔬君莫厭瓜菓我時須自可隨豐儉誰能問有無墮塵

衝博局驚燕避投壺不憚過從遠頻來訪老夫

戲留次哀三十三弟頌之

白下春泥尚未乾汴流更待小潺湲不知汝定成行不寒  
食今無數日間

春日

男兒更老氣如虹短鬢何嫌似斷蓬欲問桃花借顏色未  
甘着笑向春風

陰陰溪曲綠交加小雨翻萍上淺沙鵝鴨不知春去盡爭  
隨流水趁桃花一本作春色不堪流水送雙浮鴨鳴

以少炭寄江子之

金籍曾通玉虛殿仙曹擬拜翠微郎莫嫌薄上温磨火得  
得濃薰篤耨香温磨火事見李義山詩

戲成

長夏軒窗倚碧岑  
人間塵土莫相侵  
榴花不得春風力  
顏色何如桃杏深

和二十二弟

靜處偷看肘後書  
幽棲古有此人無  
綠叢青筍非吾事  
白浪狂風滿太湖  
襟抱恢疎老更寬  
笑談終夕盡君歡  
主人更有桃花面  
病眼其如隔霧看

秋夜情

獨眠百感秋夜情  
孤城急雨中聞更  
明朝覽鏡視鬢髮  
不知白從何處生

題超化寺壁

曲池風定碧瀾平  
小白魚如鏡裏行  
水竹再來應識我  
壁間不用更題名

送人遊江南

湧金門外斷紅塵  
衣錦城邊着白蘋  
不到西湖看山色  
定應未可作詩人

過王立之故居

醉醺架倒花仍發  
一作花無主 薜荔墻摧石亦移  
一作客有誰 此地與君凡幾醉  
年年同賦蠟梅詩

夜行

老去功名意轉疎  
獨騎瘦馬取長途  
孤村到曉猶燈火  
知有人家夜讀書

春晚圃田道中

度柳穿橋聽午雞一溝春水國門西行人不用傷新別看  
取塵間萬馬蹄

酒酣馳馬笑彎弓便擬長驅向中但恐老儒無骨相不  
湛劍履畫南宮

君王重老降褒書特賜宣陽宅一區聞說會稽人不識鑑  
湖還官借臣無

和王立之臘梅

茅簷竹塢雨幽奇岸尋花醉亦知崖蜜已成峰去盡夜  
寒惟有露房垂

老去攀興益奇招攜風月作新知但令春釀常如此百  
罰深盃倒垂

贈端本子我

驪免鷄豚今日債斷除妻子宿生緣豐登便是人天供努  
力東皇自種田

過陳無已墓

鎖門脫落封將盡題壁污漫字不分我亦嘗參諸弟子往  
來徒步拜公墳

六春

巧勝金花真樂事堆盤細菜亦宜人自慚白髮嘲吾老不  
上譙門看打春

與秦少章題漢江遠帆

楚山全控蜀漢水半吞吳老眼知佳處曾看八境圖  
江山起暮色草木斂餘昏誰感離騷賦丹青弔屈原

雲埋鳳林寺浪打鹿門山今日江風惡郎船勸不還

江濶雁不到山深猿自迷傳聞杜陵老只在灤東西  
石似浣沙石江如濯錦江征帆向何處雲霧晦蓬窓

龍興道中

澗道垂黃花山城擁紅葉人爭小舟渡馬就平沙涉

謝任伯久無書常子然寄茶謝之因簡任伯

諫議茶猶送郎官迹已疎斜封三道印不奉一行書

*[Faint bleed-through text from the reverse side of the page]*

